

იონა მეუნარგია

ილია ჭავჭავაძე

(მოგონებანი)

სამეგრელოს მუზეუმი
თბილისი 1937

იონა მეუნარგია

ნანახი და განაგონი ილიას ცხოვრებიდამ

სოლ. ცაიშვილის
რედაქციით და შენიშვნებით.

სამეგრელოს მუზეუმი
თბილისი 1937



„ილია გრიგოლის-ძე ჭავჭავაძე – ქართველი მწერალი და საქართველოს მე-19 საუკუნის მეორე ნახევრის ნაციონალურ-რევოლუციური მოძრაობის უაღრესად პოპულარული საზოგადო მოღვაწეა“.

(გაზ. „პრავედა“ 1936 წ. № 244)

წინასიტყვაობის მაგიერ

წინამდებარე წიგნი – „ნანახი და განაგონი ილიას ცხოვრებიდამ“ ხელნაწერის სასიით ინახებოდა მწერალ იონა მეუნარგიას არქივში, რომლის უმეტესი ნაწილი დაცულია სამეგრელოს მხარეთმცოდნეობის მუზეუმში.

მუზეუმს განზრახული აქვს იონა მეუნარგიას ყველა საარქივო მასალის შეკრება და აგრეთვე მისი ცხოვრებისა და მოღვაწეობის კაბინეტის მოწყობა.

მუზეუმი თავიდანვე ისახავდა მიზნად გადაერჩინა დალუპვისაგან სამეგრელოს ყოფილი მთავრის სასახლეში და სოფლად ოჯახებში გაფანტული ჩვენი კუთხის ძველი ყოფა-ცხოვრების კულტურისა და ხელოვნების დამახასიათებელი ნაშთები, კლასობრივი ურთიერთობის მაჩვენებელი ექსპონატები და სხვ.

ამ ხრით ბევრი საყურადღებო მუშაობა უკვე ჩატარებულია.

გარდა სხვადასხვაგვარი ნივთის და საყოფაცხოვრებო ექსპონატებისა, მოპოვებულია დიდძალი კოლექცია როგორც ისტორიული, ისე წინასიტორიული ეპოქების ყოფა-ცხოვრების დამახასიათებელი სხვადასხვაგვარი ნივთები, არქეოლოგიური ნაშთე-

ბი, ისტორიულ პირთა და გამოჩენილ ქართველ მწერალთა და საზოგადო მოღვაწეთა სურათები, ხელნაწერები და სხვა საარქივო მასალები.

დღემდე არ ხდებოდა ამ მასალების დამუშავება და ფართო მასებში პოპულარიზაცია. დღეს კი, როდესაც მსოფლიო მუშათა კლასის საყვარელი ბელადის დიდი სტალინის ხელმძღვანელობით პარ-

5

ტიისა და ხელისუფლების მიერ ფართოდ იქნა გაშლილი ფრონტი – ისტირიის, კლასიკოს მწერალთა მემკვიდრეობის და საერთოდ კულტურისა და ხელოვნების მოღვაწეთა შესწავლისათვის ბრძოლაში, საქ. კ. პ. (ბ) ზუგდიდის რაიკომმა სადირექტივო ორგანოების მითითებათა საფუძველზე, მუზეუმის წინაშე დასახა მთელი რიგი ამოცანებისა, პირველ რიგში დამუშავება და გამოცემა მუზეუმში დაცული საარქივო მასალებისა.

ამ მასალებს შორის თვალსაჩინო მნიშვნელობისა და ისტორიული ღირებულებისაა: წერილობითი დოკუმენტები, მოგონებანი და ფოლკლორული მასალა კერძოდ, უტუმიქავას მეთაურობით სამეგრელოს გლეხთა აჯანყების შესახებ 1857 წ, და იონა მეუნარგიას ეს აღნიშნული არქივი, რომელიც შეიცავს უმთავრესად ქართველ მწერალ-მოღვაწეთა ბიოგრაფიულ მასალებსა და მიწერ-მოწერას მათთან.

ამ არქივებში ბევრი ისეთი მასალები მოიპოვება, რომელიც დღემდე არ გამოქვეყნებულა და მკითხველი საზოგადოებისათვის უცნობია.

ამ მიმართულებით მუზეუმმა უკვე გადადგა ნაბიჯები. პირველ ნაბიჯია ი. მეუნარგიას ხელნაწერებიდან გამოცემული „ალექსანდრე ჭავჭავაძე“ და ეს წიგნი – „ნანასხი და განაგონი ილიას ცხოვრებიდან“, ორივე სოლომონ ცაიშვილის რედაქციით და შენიშვნებით.

დასახულია აგრეთვე შემდგომი მუშაობის გეგმა – მუზეუმში დაგროვილ დოკუმენტურ, ფოლკლორული მასალებისა და პირველ რიგში იონა მეუნარგიას არქივში დაცულ ხელნაწერების სრულად გამოარქივში დაცულ ხელნაწერების სრულად გამოცემის შესახებ.

შ. შენგელი.

რამდენიმე შენიშვნა

ვისაც ი. მეუნარგიას შრომები (ვგულისხმობ მწერალთა ბიოგრაფიები) წაუკითხავს, გაეცნობოდა, თუ რა დაწვრილებით გადაალაგებდა ხოლმე ის ქალაქზე იმ ფაქტებს რომლებიც მას

ამათუიმ მწერლის შესახებ ჰქონდა დაგროვილი თავისი უბის წიგნაკში, როგორც თვითონ უწოდებს „სამახსოვრო წიგნში“.

საფრანგეთის მე-19 საუკუნის კულტურაზე აღზრდილმა, საფრანგეთის უდიდესი მწერლის ვ. ჰიუგოს მეგობარმა ი. მეუნარგისამ სამწერლო ასპარეზზე გამოსვლისთანავე, გარდა „ვეფხისტყაოსანზე“ მუშაობისა, ეს სრულიად უცხო და ჩვენი სალიტერატურო ცხოვრებისათვის მეტად უჩვეულო დარგი – მწერალთა ბიოგრაფიების კვლევა აირჩია. ქართულ მწერლობაში ასეთი ტრადიციაც კი შემუშავდა: თუ რომელიმე მწერლის სრულ თხზულებათა გამოცემა განიზრახებოდა, ბიოგრაფიის შედგენისათვის უსათუოდ იონას მიმართავდნენ, რის დასადასტურებლად არა ერთი და ორი პირადი ბარათი მოიპოვება მის არქივში – ამადამ მწერლის თხზულებას ვსცემთ, ბიოგრაფიის შედგენა თქვენ დაგვევალათ და სხვა (მაგალ., ნ. ბარათაშვილზე, ი. მაჩაბელზე, გ. ჭალადიდელზე, ვ. ორბელიანზე და სხვ.).

ეს ხელნაწერი „ნანახი და განაგონი ილიას ცხოვრებაში“ ილიას სრულ ბიოგრაფიას არ წარმოადგენს; ეს უფრო მასალაა ბიოგრაფიისათვის – მეტად ძვირფასი, უტყუარი და საინტერესო მასალა, რადგან მეუნარგია მისებური სიდინჯით „ნაქუჩებ“ ფაქტებს თავისი „სამახსოვრო წიგნიდამ“ გვაცნობს. თვითონაც ხომ ამბობს „... მე აქ ილიას ცხოვრებას არა ვწერ, ილიას ცხოვრების მასალას ვაქუჩებ, რომელიც ან თითონ ილიასაგან გამიგონია, ან მის თანამედროვეთაგან მსმენია, ან თითონ ჩემის თვალით მინახავს და ამიტომ ჩემს ნანახს და განაგონს ილიას ცხოვრებიდამ მე აქ მხოლოდ დაახლოებით ქრონოლოგიურად, მაგრამ მაინც უსისტემოდ ვწერ. მე ხომ

7

მეწერილმანე ეარ ქართულის მწერლობისა და თუ ჩემგან შეკრებილის წვრილმანებით მე თქვენ ილიას სურათი, ზოგიერთ შემთხვევაში მაინც. ნათლად დაგანახეთ, ჩემს ვალს ქართულს მწერლობაში მოხდილად მივიჩნევ“-ო.

ასეთი წვრილმანები საკმაოდ მსხვილ ღირებულებათა შემცველია მწერალთა ცხოვრების შესასწავლად. აქ ჩვენ ვნახავთ ილიას სტუდენტს, საზოადო მოღუაწეს, სახელმწიფო მიხელეს, ბანკის თავმჯდომარეს, მემამულეს, რედაქტორს; ილიას ოჯახში, შინაურობაში; ილიას ხასიათს და სხვა, რაც არ შეიძლება კარგად არ ცოდნოდა ი. მეუნარგიას, როგორც ილიას გაზეთის „ივერიის“ უახლოეს თანამშრომელს (რაც ჩანს ილიას იმ კერძო წერილიდან, რომელიც მას ი. მეუნარგიასათვის მიუწერია 1885 წლის 20 დეკემბერს. წერილი იხ. მე-33 გვ.) და ქართველთა შორის წ.-კ. გამ. საზღვის მდივანს.

სამწუხაროდ, მასალა ილია – პოეტზე, მწერალზე, ამ მოგონებებში ძუნწადაა წარმოდგენილი, ხოლო ილიას მსოფლმხედველობაზე სრულებით არაფერია ნათქვამი.

ი. მეუნარგიას არ უყვარდა ყურმოკრულის, საეჭვო ნათქვამის და განაგონის ერთთავად დაჯერება და ჩაწერა, გავრცელებულ შეხედულებათა შეუმოწმებლად მიღება. მწერალს პირადად ეცნობოდა, უახლოვდებოდა, მის ცხოვრებას კვალდაკვალ სდევდა. ამისთვის ყოველ წუთში მზად ჰქონდა უბის წიგნაკი და ფანქარი. მწერლის ყოველ შეხვედრას იყენებდა, არც ერთ წუთს არ ჰკარგავდა უშედეგოდ, თუ რას იტყოდა ესათუის მწერალი ამათუიმ საკითხზე, პიროვნებაზე, ნაწარმოებზე, თავის-თავზე თე სხვა რამეზე და როგორ იტყოდა, რამდენად მნიშვნელოვანი და საზოგადოებრივი ხასიათის მატარებელი იქნებოდა ეს თქმა, რა ფორმებში გამოხატავდა მას მოქმელი და სხვ. ყველაფერი ეს იმ ნახსენებ „სამახსოვრო წიგნში“ შედიოდა, იქ იწერებოდა, ყალიბდებოდა, ზოგს ნაკვესის, ზოგსაც მომხდარი ფაქტის სახე ეძლეოდა, და ამგვარად მდიდრდებოდა და ივსებოდა ეს წიგნაკი.

„ნანახი და განაგონი“ არსებითად მოგონებაა ილიაზე, რო-

გორც ამას თვითონ მეუნარგია უწოდებს და არა ბიოგრაფია. ილიას ბიოგრაფიის შედგენა მას განზრახული ჰქონდა „შემდეგში, როცა მე მივყავი ხელი ორბელიანის, ბარათაშვილის, გ. ერისთავის და სხვათა

8

ცხოვრების აღწერას. მე ყოველ შეყრაზე ილიას ვუყურებდი, როგორც მსხვერპლს, „მუშტრის თვალით“, და როცა იმისაგან მოვდიოდი შინ, მის ნალაპარაკებს ვწერდი ჩემს „სამახსოვრო წიგნებში“, – წერს თვით ი. მეუნარგია ამავე შრომაში. ცხადია, აქ გამომდგანებულია, რომ მას განზრახული ჰქონდა ილიას ვრცელი ბიოგრაფიის შედგენა. საამისოდ დაგროვილი ჰქონდა: მასალა, პირველი წყაროები, რომლებიც მის სამახსოვრო წიგნებს ამშვენებდნენ და რომლებიდანაც მან სახელდახელოდ ამოწერა ჩვენ წინ მდებარე ფურცლები, მოგონებათა სახით ქუთაისში გამართულ ილიას სადამოზე წასაკითხავად. დანარჩენი, რაც ბიოგრაფიისათვის სისრულის მიმდევრად, მისთვის აუცილებლად და დამამშვენებლად მიაჩნდა, როგორც თვითონ აცხადებს, დასტოვა იმ სამახსოვრო წიგნაკებში, რომელთა კვალი გარდა თითო-ოროლა გვერდის ნაფლეთისა, მის არქივში (რომელიც სამეგრელოს მუზეუმშია დაცული) არა ჩანს.

ხელნაწერი, როგორც თვით ავტორის ხელით სქოლიოდ მიწერილი გვაცნობებს, წაკითხულია მოხსენებად ფოთსა და ქუთაისში 1908 წელს ილიას სადამოზე.

ცხადია, ეს ის ხელნაწერი ან ლექციაა, რომელსაც შემდეგ ი. გოგებაშვილი გამოეხმაურა პრესაში და თავისი რჩეული ნაწერების პირველ ტომშიც კი შეიტანა: „ილიას მეორედ მოკვლის განზრახვ“-სა და „მეუნარგიას ჭორები ილიას შესახებ“-ის სათაურებით. თუ რამდენად არის ჭორები ამ მოგონებაში მოყვანილი ფაქტები, ამას მიუდგომელი და დაკვირვებული მკითხველი იტყვის, როცა ი. მეუნარგიას ქვემოთმოყვანილ მოგონებებს გაეცნობა.

როგორც ვთქვით, ეს მოგონებანი მეუნარგიას 1908 წ. 27 ოქტომბერს ქ. ქუთაისში გამართულ ილიას სადამოზე წაუკითხავს. აღნიშნული სადამო კორესპონდენტს გაზეთ „ალში“ გაუშუქებია. ამ კორესპონდენტის საფუძველზე ჩვენს დიდს პედაგოგს და საზოგადო მოღვაწეს ი. გოგებაშვილს მეტად მკაცრი ხასიათის სტატიები დაუწერია,* საცა იგი დიდ გულისწყრომას გამოთქვამს მისი ძველი მეგობრის იონა მეუნარგიასადმი (ხელთა გვაქვს ი. მეუნარგიას და ი. გოგებაშვილის მიწერ-მოწერიდან რამდენიმე ბარათი, საიდანაც მათი მეგობრული ურთიერთობა ირკვევა).

* იხ. ამ წიგნის დამატება გვ. მე-55-58.

9

ი. გოგებაშვილს რომ შემთხვევა ქონდა მეუნარგიას ამ რეფერატის მოსმენისა ან წაკითხვის, მის ასეთ აღშფოთებას ადგილი არ ექნებოდა. რაც ი. გოგებაშვილს მეუნარგიას ჭორებად მიაჩნია, არსებითად კორესპონდენტის ჭორები ია, რასაც ილია ჭავჭავაძის პიროვნებისადმი თავყანისცემით გატაცებული ი. გოგებაშვილი შეცდომაში შეიყვანა. ამას ადასტურებს თვით გოგებაშვილის შემდეგი სიტყვები: „რუსეთსა და ევროპაში ჩვეულებად აქვთ – გამოჩენილი მწერლების შესახებ არ გამოაქვეყნონ მათი კერძო ცხოვრების ნაკლებუფანებანი“-ო და მოყავს მთელი რიგი უარყოფითი ფაქტებისა, ისეთი დიდი ადამიანების კერძო ცხოვრებიდან, როგორც არიან: კრილოვი, პუშკინი, ლერმონტოვი, ბაირონი და სხვ.

გოგებაშვილის ეს სიტყვები მისივე დებულების საწინააღმდეგო მოსაზრებას ადასტურებს; აბა საიდან გაიგებდა ი. გოგებაშვილი აქ მოხსენებულ დიდ ადამიანთა იმ უარყოფით მხარეებს,

თუ კი ისინი გამოუქვეყნებელი იქმნებოდა.

გოგებაშვილი ხომ თვითონ ამტკიცებს: ილია, როგორც ჭკუიანი და დინჯი ადამიანი ბანქოში ფულს არ აგებდა, არამედ იგებდაო. მამასადამე, ილია ბანქოს თამაშობდა და იგებდა თუ არა, ეს არავისთვის იყო საინტერესო. მეუნარგიაც ხომ ამ ფაქტების აღმწესხველია, როგორც თვითონ ამბობს „წვრილმანების“ შემკრები, ილიას ცხოვრებიდან ნანახისა და განაგონის, ქრონოლოგიურად, მაგრამ მაინც უსისტემოდ მომქუჩებელი. ი. მ ა ნ ს ვ ე ტ ა შ ვ ი ლ მ ა * და კოხტა აღფხაზმაც ** ხომ ეს ფაქტები აღნიშნეს თავიანთ მოგონებებში. ამით არავითარი ჩირქი არ ეცხება მგოსნის სახელს. არც არაფერია აქ უჩვეულო გარდა იმისა, რომ საფრანგეთის ლიტერატურაზე აღზრდილმა მეუნარგიამ საქართველოშიც გადმონერგა ერთი ფრიად სიმპატიური, ქართული ლიტერატურისათვის მართლაც უჩვეულო ტრადიცია – მწერალთა ცხოვრებისა და მოღვაწეობის აღწერა – დევიზით: „საყვარელი კაცისა ყველაფერი უნდა ვიცოდეთ“ *** და რასაკვირველია, რომ საყვარელი ილიას ცხოვრებიდან, მისი ბიოგრაფიული, ზოგიერთი წვრილმანი, მაგრამ მაინც ადამიანის დამახასიათებელი შტრიხები აღნიშნა თავის მ ო გ ო ნ ე ბ ე შ ი .

* იხ. მანვეტაშვილი – მოგონებანი გვ. 86, 143.

** იხ. „ლიტ. მემკვიდრ“. გვ. 575.

*** იხ. ი. მეუნარგია – ცხოვრება და მოღვაწეობა გრ. ორბელიანისა, გვ. 145.

10

საბედნიეროდ, როგორც მოსლოდნელი იყო, ამ მოგონებებში ისეთი არაფერი აღმოჩნდა, ი. გოგებაშვილის აღმფოთებას რომ შეფარდებოდეს. ილიასადმი მ ე უ ნ ა რ გ ი ა ს გ ა ნ წ ყ ო ბ ი ლ ე ბ ი ს ა მ გ ვ ა რ ი კ ვ ა ლ ი ფ ი კ ა ც ი ა უ მ ა რ თ ე ბ უ ლ ო ი ყ ო და გ ა უ გ ე ბ რ ო ბ ა ზ ე ა გ ე ბ უ ლ ი .

ამ გაუგებრობის გასაფანტავად მოგონებათა კრებულს დამატების სახით ვურთავთ: მეუნარგიას მიერ წარმოთქმულ სიტყვას ილიას დასაფლავებაზე, გაზეთ „ალში“ მოთავსებულ კორესპონდენციას, რომლის ტ ო ნ ს უთუოდ მიხედება დაკვირვებული მკითხველი, როცა წააწყდება გოგებაშვილის პირველ სტატიაში შემდეგ სიტყვებს: „ილია მიწასთან გაასწორაო“ გულისწყრომით სწერს კორესპონდენტი თ ვ ი თ (ხაზი ჩამია ს. ც.) გაზეთი „ალისა“ და ი. გოგებაშვილის ორივე სტატიას.

ამით მეტი ნათელი მოეფინება ამ ორი შესანიშნავი პიროვნების დიდ ილიასადმი მიმართულ სიყვარულის ნიდაგზე აღმოცენებულ კონფლიქტის უსაფუძვლობას.

ფრიად საყურადღებო და ანგარიშგასაწევია ამ მხრით ერთი ადგილი ნ. ნ ი კ ო ლ ა მ ი ს ი მ კერძო წერილიდან, რომელიც მას (ნიკოლაძეს) ფოთიდან ი. მეუნარგიასთვის მიუწერია (1908 წლის დეკემბრის თარიღით), სადაც, სხვათა შორის, ლაპარაკია წინამდებარე მოგონებათა კრებულზე და ი. გოგებაშვილის სტატიებზე: „... გულზე გავსკვი, გოგებაშვილის სტატია რომ წავიკითხე შენს (მეუ-

* აღსანიშნავია აგრეთვე, რომ ამავე გაზ. „ალის“ მე-5 ნომერში დაბეჭდილია „ილიას სადამო ბაქოში“, სადაც ვინმე დათიკო ჯაფარიძეს წაუკითხავს რეფერატი ილიას შესახებ. გაზეთი კი რეფერენტს შემდეგი სიტყვებით ამკობს: „მის გამოსვლას არ გამოსვლა სჯობდა“... „მან სთქვა: ილიამ ბევრი დასწერა გლეხების მდგომარეობაზე და მაგალითისათვის ძლივს მიგვითითა აქ დადგმულ დრამაზე – „ბატონი და ყმა“ დადგმულა იმ სადამოს – ს. ც.)... „ილია იმიტომ მიყვარს, რომ მამულიშვილიაო, უყვარს ჩვენი ერი და ივარავს მას გარეშე და შინაურ მტრებისაგან, განსაკუთრებით შინაურ დ უ ხ ჭ ი რ ა დ ა მ ი ა ნ ე ბ ი ს ა გ ა ნ ო “ (კურსივი ავტორისა)... „ამ პოლიტიკურად დაუწიფებელ ბაღლებს გონიათ, ვინც მათგან გამართულ ილიას სადამოს დაესწრება, ის უსათუოდ

ნარგიას. – ს. ც.) წინააღმდეგ. Мертвые хоронят мертвых! დაბეჭდე შენი ლექცია, ან დაბეჭდე პასუხი, რომ კრიტიკის მეტი ზეერი სხვაც იყო კეთილი ილიკოზე-თქო. ნუ მიაყრუებ ამ საქმეს, ხომ იცი, კვდრების ქვეყანაში ვცხოვრობთ (ავტორის მართლწერა მთლიანად დაცულია – ს. ც.).

როგორ მიიღო ნიკოლაძის ეს რჩევა მეუწარგიამ, არ ვიცი, მაგრამ ფაქტი ასეთია: გოგებაშვილის წერილის საპასუხოდ მას არადაუბეჭდია-რა, ხოლო დაუწერია თუ არა, არც ის ვიცი. ასეთი რამ მის არქივში არა ჩანს, გარდა ერთი პატარა ჩანიშვნისა ერთერთ მის უბის წიგნაკში, სადაც ფანქრით ჩაწერილია შემდეგი სიტყვები:

„1. გოგებაშვილის ჭორები. გავჩუმდი. გოგებაშვილის აგენტები შინ მყავს, ჩემი მიშა, ჩემი ლილი და ყველა მასწავლებელი, ყველანი მისნი პატრიოტნი... მე მტყუანი, ის მართალი. ნამდვილად კი ეს ასე არ არის. რა იყო? Бурлак ვოსტორგოვი სად იყო კავკასიაში. ნიკოლაძის წერილი, ნუ წაიყრუებო...“

„2.....“
მეტად საგულისხმოა და დამაფიქრებელი ეს ნაჭერ-ნაჭერ მოტანილი სიტყვები. მით უმეტეს ის უბის წიგნაკშია ჩაწერილი და დაუმთავრებელი. როგორც ენახეთ, ციფრი 2 ცარიელია. არც შემდეგ შევსებულა იგი. ცხადია, მეუწარგიას ემძიმა გოგებაშვილისადმი პასუხი. იმოტომ კი არა რომ არ შეეძლო. არა. მას მეტად ძნელი გადასალახავი მიზეზი გადაეღობა წინ.

ამ მიზეზს ის გადმოგვცემს შემდეგ სიტყვებში: „გოგებაშვილის აგენტები შინ მყავს, ჩემი მიშა, ჩემი ლილი და ყველა მასწავლებელი“. მ ი შ ა და ლ ი ლ ი მისი უსაყვარლესი შვილები იყვნენ და ვინ იცის, თუ რამდენი ასეთი საყვარელი შვილები იზრდებოდა მაშინ გოგებაშვილის „დედა-ენით“ და „ბუნების-კარით“, რამდენი მოსწავლე და მასწავლებელი შესტრფოდა მის დიდ ღვაწლსა და მშობლიურ ზრუნვას მომავალ თობაზე.

ი. მეუწარგიას, როგორც ადამიანსა და მოღვაწეს, ვინც ახლოს გასცნობია, ის ღრმად დარწმუნდება თუ რაა მიზეზი იმ თავშეკავებისა, რომელიც უთუოდ იყო მწვავე და ტრაგიკული. ეს სიმწვავე მან ახალი თაობისადმი რწმენისა და გოგებაშვილის სახელისათვის თავის გულში დააცხრო და დაფერფლა.

* ორივე დაიღუპა 1922 წ.

12

მისი მეუღლე ნ ი ნ ო მ ე უ ნ ა რ გ ი ა ს გადმოცემით – შინაურულად ეს მოგონება იონას თბილისელ ნაცნობ-მეგობრუბისათვისაც წაუკითხავს (გოგებაშვილი ამ წაკითხვასაც არ დასწრებია), სადაც ასეთი აზრიც კი შეაგებეს თურმე: ცოცხალი ილია წინ დაგვიყენეთ.

ამ მოგონების – ნიკოლაძის თქმით „ლექციის“ – გამოქვეყნებისათვის ავტორს დიდად არ უზრუნვია. ეს ნათლად ჩანს თვით ამავე შრომის ხელნაწერიდან და ი. მეუწარგიას არქივში აღმოჩენილ კერძო წერილიდან, რომელსაც აქვე ვათავსებთ დამატების სახით (ნახ. გვ. 62).

მოგონებაში აღწუსებული ფაქტები ილიას შესახებ კომენტარიებს თითქმის არ საჭიროებს. არც იქ მოხსენებულ პირთა ვინაობის ახსნა-განმარტებას ვურთავთ ცალკე, რადგან მკითხველისათვის ისინი თითქმის საკმაოდ ცნობილი პირები არიან, ხოლო თუ არის ვინმე ისეთი, რომელიც ფართო მასაში ნაკლებადაა ცნობილი ან ფსევდონიმს არის ამოფარებული, იქვე სქოლიოში მოკლედ განმარტებული გვაქვს.

დასასრულ, საჭიროდ ვცანით აგრეთვე დამატების განყოფილებაში შეგვეტანა ი. მეუნარგიას უბის წიგნაკებში ნაპოვნი ზოგიერთი ჩანაწერი ილიას შესახებ და მის არქივში აღმოჩენილი ილიას მეორე წერილი მეუნარგიასადმი, როგორც რამდენიმე ახალი შტრიხის შემტანი ილიას ბიოგრაფიულ მასალებში.

შრომაში მთლიანად დაცულია ავტორის სტილი და ორთოგრაფია; თითო-ორი ტექნიკური უსწორობის გარდა, ჩვენს მიერ არაფერი არ არის შესწორებული.

სოლ. ცაიშვილი.



იონა მეუნარგია

ნანახი და განაგონი ილიას ცხოვრებიდან *

როგორც აკაკის, „კაცია-ადამიანის“ დამწერსაც მწერლობაშიც მარტო ილია რომ დაემახოს მგონია არა წახდეს რა. თუ რუსულად ილია გრიგოლის-ძე ითქმის, ჩვენთვის მარტო ილია როგორღაც უფრო მოხერხებულია, უფრო ქართული.

ილია იყო ღარიბი ოჯახის შვილი. იმ დროებაში როცა ის დაიბადა (1837 წ.) ჭავჭავაძიანთ გვარში დოვლათიანი სახლი მარტო ერთი სახლი იყო, ალექსანდრე

გარსევანის შვილის, საქართველოს მგოსნის, რომლის ოჯახისაგან გამოვიდნენ სამეგრელოს დედოფალი ეკატერინე, ნინო გრიბოედოვისა, თამარ ბატონიშვილისა – ერეკლეს მეუღლე, ბარონესა ნიკოლაი და სხვ. ამ დროებში „კნიაზიანთ“ ოჯახს კახეთში მარტო ალექსანდრეს ოჯახს ეძახდნენ. სხვების სიმდიდრე მარტო პური და ღვინო იყო. ილიას მამა გრიგოლიც, შექსპირის თქმისა არ იყოს, მარტო სისხლით იყო მდიდარი და არა ქონებით. მეტსახელად გროგოლს პაჭუას თურმე ეძახდნენ. გრიგოლი ერთ დროს ოფიცრად მსახურობდა ნიჟეგოროდის დრაგუნის პოლკში და რამდენადმე განათლებული კაცი იყო. დედამისი, სახელად მაგდანი, იყო სომხის ქალი, ბებური-შვილის ასული.

* წაკითხულია ილიას საღამოზე ქუთაისში, 27 ოქტომბერს.

15

როგორც დავით ერისთავს, ილიასაც არაერთხელ სმენია მისი ხასიათის თვისების ახსნა სომხის ქალის შვილობით.

ერთხელ, როდესაც ილია დუშეთში მომრიგებელ მოსამართლედ იყო და ერთს სადილზე რაღაც შემთხვევის გამო სიტყვა წარმოსთქვა, ეს სიტყვა სხვაზე უფრო ერთს სომეხს მოეწონა.

– უჰ, შენი ჭირიმე, კნიაზო, კარგი იმიტომა ხარ, რომ დედა სომეხი გყავსო, უთხრა იმას სომეხმა.

– საკვირველია, თქვენმა მზემ, თქვენ დედაც სომეხი გყავს და მამაც და ასეთი თავხედი გამოსულხარ, მიუგო გულნაკებნმა პოეტმა.

ილიას პატარაობაზე თითონ მისგან არა ერთხელ გამიგონია, რომ იმან წერა-კითხვა სოფლის მთავრისაგან ისწავლა, რომ დედამისი სხვადასხვა მოთხრობებს და „ვეფხის-ტყაოსანს“ უკითხავდა იმას და სხ. მაგრამ ამანებზე მე აქ არ ვილაპარაკებ გრძლად, რადგანაც ამანზე თითონ მან დასწერა თავის მოკლე ავტობიოგრაფიაში.

მეთერთმეტე წელი რომ დაუდგა ილიას, ის ქალაქს ჩამოიყვანეს და ვიღაც რაევსკის პანსიონში მისცეს. აქედამ იმან იწყო სიარული გიმნაზიაში და რა დაამთავრა მერვე კლასი, გაემგზავრა პეტერბურგს – 1857 წელს, საცა შევიდა უნივერსიტეტის იურიდიულ ფაკულტეტში.

სანამ ქალაქს ჩამომიყვანდნენ, – გვითხრა ერთხელ პოეტმა (გოგებაშვილთან, სადილზე), მე ხშირად მაციებდა და ტყლიპი გამიდიდდა (აბსტრუქცია მქონდაო, თქვა). ქალაქს რომ ჩამომიყვანა მამაჩემმა, ყველა ექიმები დამასიეს, მაგრამ ვერას გახდნენ რა. მაშინ ვიღაც ერთი ფერშალი მომიყვანეს ავლაბრიდში. კაბა ეცვა, თავზე კარტუზი ეხურა, ჩოფურა იყო. რომ ხატვა ვიცოდე,

დავხატავ, ისე ცოცხლად მახსოვს იმის სურათი. იმან წამალი დამალეგია, წამოსვა ტყლიპზე რაღაც და სთქვა: თავის დღეში ამას არ გააციებსო და მართლა მის აქეთ ჩემთვის არ გაუციებიაო, გაათავა პოეტმა.

ჩვენ რომ რუსეთს მივდიოდით და კავკასიონის მთებზე ვიწყეთ ასვლა, გვითხრა სხვა დროს ილიამ, მღეთის დაშვებაზე შემოგვეყარა გრიგოლ ორბელიანი, რომელიც რუსეთიდან ბრუნდებოდა თბილისს. გრიგოლი ფეხით მოდიოდა, ჩვეულებრივად ზურგს უკან ხელ-შეწყობილი, პირმღიმარე, დაფიქრებული; დაშორებით მოსდევდა მას ნელის ნაბიჯით ეკიპაჟი. ჩვენ რომ დავინახეთ პოეტი თავისის ელემენტით – კავკასიის მთებით და ღრუბლით გარშემოხლდვილი, აღტაცებით ვთქვით ერთმანეთში: სწორედ ეხლა ამ დამშვიდებულ გულზე ლექსს რასმე უწერს ამ მშვენიერს ბუნებასაო, და იმ დროიდან დაწყებული სიკვდილამდის ილია იყო თავყვანისმცემელი გრ. ორბელიანისა.

*
* *

როგორც გიმნაზიაში, ისე უნივერსიტეტში ილიას ყოველისფრით განსხვავებული დრო შეხვდა. თბილისში ის რომ ჩამოვიდა პირველად, აქ ვარანცოვისაგან დაწერგილს ხეს ნაყოფი გამოეღო, „ცისკარი“ გამოიცა.

ქართული თეატრი დაარსდა.

ჟურნალმა და დრამამ ცოტაოდნად ქართული საზოგადოება გამოაღვიძა.

თე ეს გამოღვიძება ყველგან თვალსაჩინო არ იყო, თუ დაბლა ხალხს სულ ისევ სძინავდა, მაღლა წრეებში განათლებულ საზოგადოებაში ქართველმა კაცმა თვალი გაახილა. ამ საზოგადოებას ილიაც ეკუთვნოდა, როგორც გიმნაზიის მოწაფე.

17

ნიადაგი და ატმოსფერა კარგი ჰქონდა მომავალს მგოსანს, რომ ამ პირობებში მას ჩანერგოდა გულში მამულის და ენის სიყვარული.

ილიას რუსეთშიაც განსხვავებულ დროს შეხვდა მისვლა, როგორც ჩვენს დროში, შემდეგ იაპონიასთან წაგებულის ომისა, სულ ყველაფერი რყევამია და მიისწრაფის ახალის საუკეთესო ცხოვრებისადმი, ისე იმ დროს, შემდეგ ევროპის კოალიციისაგან დამარცხებისა, რუსეთი ახალის წესწყობილებისადმი მიისწრაფოდა. თავიდათავი მოთხოვნილება მაშინდელის საზოგადოების საუკეთესო ნაწილისა იყო გლეხთა განთავისუფლება.

უნივერსიტეტი სათაურში უდგა იმ დროისთვის საჭირო რეფორმების შემოღების საქმეს და სწორედ მაშინ, როცა გლეხთა განთავისუფლების საქმე თავდებოდა, სტუდენტებმა არეულობა მოახდინეს.

ამ არეულობას მოყვა ილიას საქართველოში დაბრუნება.

რეფორმის წინაპირობებში აქ ილიას ან რა ადგილის შოვნა შეეძლო თავის ცოდნისა და ჰაზრების საქმეში გამოსაყენებლად. ჟურნალ-გაზეთობა ამ დროს ჯერ საქმე არ იყო.

„ცისკარი“ კი იბეჭდებოდა, მაგრამ ჟურნალს მკითხველი არ ყავდა. დაბეჭდილ ნომრებს რედაქტორი თითონ უგზავნიდა გავლენიან, მწერლობის მოყვარე ნაცნობებს – გრიგოლ ორბელიანს, გიორგი მუხრან ბატონს, * მიხეილ თუმანოვს, ** კოლხიდელს, *** პლატონ

* ცნობილი მემამულე. ეროვნულ საკითხის შესახებ წიგნის ავტორი. ამ პირზე ილიამ თქვა: „პირველ თქვენგანმა, იმა ბედშავმა მას (ერს – ს. ც) მკვდრის სუდარა გადააფარა (გრიგოლ ორბელიანთან პასუხი – ს. ც.).“

** პოეტი, „ცისკრის“ თანამშრომელი „მოლაყბის“ ფსევდონიმით (1818-1875) ს. ც.

*** გრ. დადიანი, სამეგრელოს უკანასკნელი მთავრის ძმა (ს. ც.).

18

იოსელიანს და მათი შემწეობით დიდი გაჭირვებით არსებობდა ის თითონ, მისი მესტამბეები და მისი ჟურნალი. თანამშრომლებისათვის ფული არ მოეძებოდა რედაქტორს და არც იყო მოსალოდნელი ახლო მომავალში, რადგანაც საზოგადო ცხოვრების პირობები ასეთი იყო მაშინ საქართველოში.

სამშობლოში ჩამოსულ ილიას გზაზე სვეტი დაუხვდა, რომელზედაც ეწერა: მარჯვნივ წახვალ ჩინოვნიკი იქნები და მამლარი, მარცხნით წასვალ, მწერალი იქნები და მშიერი.

რომ მარჯვნივ წასვლა, ე. ი. შესაფერი ადგილის შოვნა არც ისე ადვილი იყო იმ დროს, ბუნებრივად მიდრეკილებამ ილია წაიყვანა მარცხენა გზით. ილიამ ჯერ ცოტა ხანს „ცისკარში“ ბეჭდა მისი ნაწერები და შემდეგ 1863 წელს საკუთარი ჟურნალი გამოსცა „საქართველოს მოამბე“.

ამ ჟურნალში დაბეჭდა პირვილად ილიამ „კაცია-ადამიანი“, „გლახის ნაამბობი“, „რამდენიმე სურათი ყაჩაღის ცხოვრებიდან“ და ბევრი სხვა ჩინებული ლექსები.

აქვე დაიბეჭდა ნაწერები ვიქტორ ჰიუგოსი, პრუდონისა, ბასტიასი, ბელინსკისა და სხვ.

ახალმა ჟურნალმა ახალი სიტყვა გააგონა ქართველ საზოგადოებას. ეს სიტყვა მით უფრო დიდი მნიშვნელოვანი იყო და დროზე ნათქვამი, რომ საქართველოში

მზადდებოდა ამ დროს გლეხთა განთავისუფლება – ორის წლის წინათ რუსეთში მომხდარი.

ახალი სიტყვა ძველებს არ მოეწონათ.

და ასტყდა ძველსა და ახალს შორის კამათი, რომელმაც რამდენიმე წლის შემდეგ გამოიწვია ილიასი და გრიგოლ ორბელიანის ცნობილი პოლემიკა.

19

ძველ თაობას არ მოსწონდა არც ილიას ჟურნალი და არც ილიას სიტყვები. ამ დროს თავად-აზნაურთა ყრილობაზე, როგორც ქრისტეფორე მამაცოვი მოწმობს ერთს კრებაზე, საცა ილია ამტკიცებდა, რომ – გლეხი მიწიანად უნდა გავანთავისუფლოთო, ვიღაც თავადი იმას ხანჯლით თურმე მივარდა ისე, როგორც გაბრიელ ეპისკოპოსს დაუპირა მოკვლა ვიღაც კანდელაკმა ქუთაისში იმავე მიზეზის გმო.

*

* *

„საქართველოს მოამბე“ რომ გამოვიდა, ბატონი-შვილს ერეკლეს წაეკითხა ჟურნალი და ეთქვა თავისიანებში: დემოკრატიული ჟურნალი არისო.

სასახლის კაცს, გიგო სუმბათოვს, ამისათვის ყური მოეკრა, დაეხსომებია და როცა შემთხვევამ ნება მისცა, ეთქვა ილიასთვის:

– ილიავ, წავიკითხე შენი ჟურნალი და უნდა გითხრა, დემოკრატიჩესკი არის.

– როგორ თუ დემოკრატიჩესკი?

– ისე დემოკრატიჩესკი.

– მაშ რა გინდა იყოს?

– არისტოკრატიჩესკი.

– ეს თუნდ ბატონიშვილს ერეკლეს ეთქმის, მაგრამ შენ რაო ჩემო?

– ვითომ და რათაო?

– აბა რა გაქვს შენ არისტოკრატიჩესკი, აი თუ გინდა თავი (დიდი შნოს-პატრონი არ იყო).

– თავი კი განზე იყოს, მაგრამ შენი ჟურნალი კი მაინც დემოკრატიჩესკი არის, განუმეორა სუმბათოვმა.

„საქართველოს მოამბემ“ ზემოთქმული მიზეზების გამო დიდხანს ვერ იცოცხლა. საშუალება რომ შემოაკვლდა

* სამხედრო პირი მახლობელი თესავი ცნობილი კონსტ. მამაცაშვილისა. – ს. ც.

ანება. მარცხენა გზით სიარულისაგან რომ არაფერი გამოვიდა, ილია მარჯვენისაკენ გაემართა.

„ლიბერალობა ოქროს ჯაჭვზე გასცვალა“.

*

* * *

1864 წლის დამლევს ილია გაგზავნეს იმერეთს, ქუთაისის გენერალგუბერნატორის ცალკე მინდობილობათა მოხელედ, რომელმაც დაავალა მას გამოერკვია რა ურთიერთობა სუფევდა მემამულეთა და გლეხკაცთა შორის, ბატონ-ყმობისაგან წარმომდგარი.

როცა ბატონ-ყმობა მოისპო და საგლეხო დაწესებულებები დამკვიდრდა თბილისის გუბერნიაში(4 ნოემბერი 1864 წ.), ილია დანიშნეს მომრიგებელ შუამავლად დუშეთის მაზრაში.

ამაზე უკეთესს ადგილს ილიასათვის კაცი ვერც კი წარმოიდგენდა. მომრიგებელი შუამავალი, კანონმდებლის აზრით, გლეხ-კაცის მამაა, მისი „მფარველი ანგელოზი“ როგორც ამბობდნენ იმ დროებში, როცა თანამდებობა არსდებოდა. კანონი იმას სდებს იაროს სოფელ-სოფელ და ადვილზე გაარჩიოს ნაბატონვეთა და გლეხთა შორის მომხდარი ცილობა. ის არის ობლის პატრონი, სოფლის მართვა-გამგეობის მეთვალყურე, მასწავლებელი და მოძღვარი გლეხკაცობისა. ილიაც სწორედ საამისოდ იყო დაგეშილი და მერე ის დაინიშნა მომრიგებელ შუამავლად არა სადმე სომხეთში, როგორც დღეს არის მაგალითად, გადავარდნილი, ილია ჭყონია, დუტუ მეგრელი, არამედ თავისიანებში, არაგვის პირად, მცხეთიდან ორ ნაბიჯზე, მთიულეთს ახლო, მყინვარის კალ-

* საზოგადო მოღვაწე, მწერალი და პუბლიცისტი. – ს. ც.

თებზე, სადაც ის პოვნოდა ყოველგვარ მასალას, როგორც მგოსანი, ენის მოყვარე, მამულის ერთგული; მარტო მთიულეთი და მისი პოეზია რად ღირდა მგოსნისთვის და ილიას მისი ადგილი არა სხვა სახელმწიფო სამსახურზე არ უნდა გაეცვალა, მაგრამ არ ვიცი რა იყო მიზეზი, როცა ჩვენში შემოვიდა სასამართლოს რეფორმა (1868) ილიამ შუამავლობას თავი დაანება და ის დანიშნულ იქნა დუშეთის მომრიგებელ მოსამართლედ,

მომრიგებელ შუამავლად ყოფნის დროის ამბავი მე არა გამიგონია რა ილიასაგან. მსოლოდ, ერთხელ, როცა ჩინოვნიკების ქუდის კაკარდაზე ჩამოვარდა სადღაც ლაპარაკი, ილიამ მთიულეთის გულუბრყვილობის ნიმუშად გვიამბო, თქვენთან პატივი, ბატონებო და შემდეგი:

პოსრედნიკად რომ ვიყავი, ერთხელ ანაზღეულად

მთიულეთს მომიხდა მისვლა, საცა კვირა დღეს ხალხი მო-
გროვილიყო ერთს სოფლის სასამართლოში. რაღაც საქ-
მის გამო მე მამასახლისს ვუბრძანე დაეზარებია ერთი
გლეხი, რომელიც შორი-ახლო იდგა იქიდან. მამასახლისმა
ბრძანება გზირს გადასცა. გზირი იქვე მიდგა განზე, და რაც
ძალი და ღონე გააჩნდა, ხმა-მალლა დაუძახა დაზარებულს.
დაზარებულმა დაბლიდამ იყო თუ მალლიდამ ხმა მისცა
გზირს და მათ შორის გაიმართა ამ გვარი მიძახილ-მოძახილი:

- გიზარებენ ჩქარა!
- ვინ მიზარებს?
- ჩინოვნიკი.
- ვინ ჩინოვნიკი?
- აი ქუდზე რომ ქათმის... რაღაცა აქვს ის გიზა-

რებს.

ამის გამგონე ილია იტყოდა, ვითომ და ნაპოლეო-
ნის გენერალმა ვატერლოოს მინდვრიდამ სიტყვა რომ

22

შეუთვალა ინგლისელებს რით იყო ამ სიტყვაზე უფრო
გემრიელიო?

მომრიგებელ მოსამართლედ ყოფნის დროიდან მო-
გონება უფრო საინტერესოა.

თვითონ ილიამ გეომბო:

მოსამართლედ რომ ვიყავი ერთი გლეხი მიწას ედა-
ვებოდა ყაზიბეგს. – ბატონო, მიწა ჩემია, თეიმურაზ მე-
ფის დროსა მაქვს ნაყიდი, მოწმეცა მყავს და ახლა ყა-
ზიბეგი მართმევს, მიშველე დამიფარეო, შემომჩვილა
გლეხმა.

მე დავიზარე გლეხისაგან ნახსენები მოწმე.

– შენ მოწმე ხარ, რომ ესა და ეს მიწა ამ გლეხს
აქვს ნაყიდი – თეიმურაზ მეფის დროს?

– დიახ, შენი ჭირიმე, მოწმე ვარ, თუნდ დამა-
ფიცეთ, ფრჩხილის ნაკვეთი ამილია.

თურმე ძველი ჩვეულება ყოფილა, როცა მიწას იყი-
დდა ვინმე, დამსწრე მოწმეს ფრჩხილს მოსჭრიდნენ.
ამისათვის გასამრჯელოს აძლევდნენ იმას – და ეს მოწმე
ვალდებული იყო უფროსი შვილისთვის ეამბნა ამ ნას-
ყიდობის ამბავი. შვილი შვილიშვილს გადასცემდა და
ამგვარად ნასყიდობის ისტორია გადადიოდა მოდგმიდამ
მოდგმაზე. თუ ვისმე შვილი არ ეყოლებოდა იმათთვის
უნდა ეამბნა ვინც გვარში უფროსი იქნებოდა.

ილიას ეს ჩვეულება მეტად არ გაეგონა. ძლიერ
მოეწონა და მოწმის ჩვენების თანახმად სადაო მიწა
გლეხს მიუსაჯა.

ყაზიბეგმა აპელაცია გადაიტანა, საცა სწერდა: მოზ-
რიგებელ მოსამართლემ მკვდრები ააყენა მიწიდან და
ჩვენება ჩამოართვაო, Мертвых допрашивает-о.

* ავტორს ეს სტრიქონები გამოყოფილი აქვს ასეთი მინაწერით: „უწმაწურია და არ წამიკითხავსო“. – ს. ც.

ამაზე ილია იტყოდა: ბაბილონში აგურზე იპოვეს წარწერა ესადა ეს მამული ნასყიდია და ამ ნასყიდობის მოწმეა ისა-და ეს, რომლის ფრჩხილი ამ აგურში არისო. გატეხეს აგური და შიგ ფრჩხილი ნახესო.

მეორე მოგონებაც ილია მოსამართლისაგან განაგონი: ერთჯერ ილიამ ერთი ძმის მაგიერ მეორე გაასამართლა და საპატიმროში ჩასვა.

ვიღაც ზაქარიას ბრალდებოდა ხეების მოპარვა. საქმის გარჩევის დროს მოსამართლემ ბრალდებულის გვარი მოიკითხა.

– მე გახლავარ ბატონო, წამოიძათა გლეხმა.

– შენ წაილე ხეები?

– დიახ, ბატონო წავილე.

რაკი დანაშაული ეჭვს გარეშე იყო, იქვე განჩინება დავსწერე და ბრალდებული საპატიმროში გავვზავნე. ჯერ კიდევ საპატიმროში ყოფნა არ გაეთავებინა დასჯილს, რომ ჩემთან მოვიდა მისი ძმა.

– შენ ვინა ხარ?

– ესა და ეს ზაქარია გახლავარ ბატონო.

– როგორ ზაქარია, ის ხომ ციხეში არის?

– არა შენი ჭირიმე, ციხეში ჩემი ძმა გავვზავნე.

მე საქმეები მქონდა ქალაქში და არ მეცალა, მიპასუხა გლეხკაცმა.

მომრიგებელ მოსამართლედ ილია დარჩა 6 თუ 7 წელი.

*

* *

1874 წელს ილიამ სულ დაანება თავი სახელმწიფო სამსახურს და შეუდგა თბილისის საადგილმამულო ბანკის საქმეს. ამ წელს თბილისის თავად-აზნაურთა კრებამ

ის აირჩია კომისიის წევრად, რომელსაც დაევალა ბანკის წესდების შედგენა და როცა ეს წესდება თავად-აზნაურობამ მოიწონა, ილია მათსავე მინდობილობით გაემგზავრა პეტერბურგს და იქ მისი მეცადინეობით ეს წესდება დამტკიცდა. შემდეგ 1875 წელს ამ წესდების თანახმად თბილისში გაიხსნა საადგილ-მამულო ბანკი და ილია არჩეულ იქნა ამ ბანკის გამგეობის თავმჯდომარედ.

ამის შემდეგ ილიას გაეხსნა ფართო ასპარეზი მოღვაწეობისა საქართველოს საქმეთა სასარგებლოდ. ამ დღიდან მთელი ოცდაათი წლის განმავლობაში თბილისში ქართული საზოგადო საქმე ისეთი არა დაწყებულა რა,

საცა ილია თავკაცად არ ყოფილიყოს, თავ-მრჩევლად, საქმის გადამწყვეტად. ვიდრე დიმიტრი ყიფიანი ცოცხალი იყო, ვიდრე გაბრიელ ეპისკოპოსი მეტყველებდა, ვიდრე გრიგოლ ორბელიანი ზემოდამ დაყურებდა ახალთა თაობათა, ილია ჭავჭავაძეზე მაღლა კიდევ თუ იხსენებოდა სხვისი სახელი, მაგრამ მას შემდეგ რა კი ესენი მიიცვალნენ ილია დარჩა პირველ კაცად საქართველოში.

ამას იქით ილია არის: ილია ბანკირი, ილია რედაქტორი, ილია წერაკითხვის საზოგადოების თავმჯდომარე, ილია დრამატიული საზოგადოების თავმჯდომარე, ილია სათავადაზნაურო სკოლების გამგეობის წევრი, თავმჯდომარის ამხანაგი, ილია მწერალი, ილია მოლექსე, ილია წარმომადგენელი ქართულის მწერლობისა, მასპინძელი უცხოელთა სტუმარ-მწერალთა და სსვადასხვა.

მე აქ ილიას ცხოვრებას არა ვწერ, ილიას ცხოვრების მასალას ვაქუჩებ, რომელიც ან თითონ ილიასაგან გამიგონია, ან მისთა თანამედროვეთაგან მსმენია, ან მე თითონ ჩემის თვალით მინახავს და ამიტომ ჩემს ნანახს და განაგონს ილიას ცხოვრებიდამ მე აქ მხოლოდ და-

25

ახლოვებით ქრონოლოგიურად, მაგრამ მაინც უსისტემოდ ვსწერ. მე ხომ მეწვრილმანე ვარ ქართულის მწერლობისა და ჩემგან შეკრებილი წვრილმანებით მე თქვენ ილიას სურათი ზოგიერთ შემთხვევაში მაინც ნათლად დაგანახეთ, მე ჩემს ვალს ქართულს მწერლობაში მოხდილად მივიჩნევ.

*

* *

მე გავიცანი ილია პირველად 1879 წელს.

ამ წლიდამ დაწყებული დღემდე მისის სიკვდილისა მე ილიას კეთილგანწყობილებას არ მოვკლებივარ. პირველს ოთხ-ხუთ წელს, როდესაც თბილისში ვცხოვრობდი, მე მასთან უფრო ხშირი მისვლა-მოსვლა მქონდა ჯერ როგორც წერაკითხვის საზოგადოების გამგეობის წევრს და საქმის მწარმოებელს და შემდეგ როგორც გაზეთების თანამშრომელს.

სამწუხაროდ, იმ დროებიდამ ჩემს სამახსოვრო წიგნში თითქმის არაფერი არ ჩამიწერია ილიას ცხოვრებიდამ. მაშინ ჯერ არ მქონდა განზრახული შემედგინა ჩვენი მწერლების ცხოვრების აღწერა და ბევრი რამ ილიას ცხოვრებიდამ, რასაც დღეს შეეძლო მისი ბიოგრაფიის გახალისება მე მიმავიწყდა. მხოლოდ შემდეგში, როცა მე მივყავი ხელი ორბელიანის, ბარათაშვილის, გიორგი ერისთავის და სხვათა ცხოვრების აღწერას, მე ყოველს შეყრაზე ილიას ვუყურებდი და ვუსმენდი, რო-

გორც მსხვერპლს „მუშტრის თვალით“ და როცა იმისგან მოვდიოდი შინ, მის ნალაპარაკებს ვწერდი ჩემს სამახსოვრო წიგნში.

სულ ყველაფერი რასაც აქ მოვახსენებ მსმენელს, ან არის ამოდებული ჩემის სამახსოვრო წიგნიდამ, ან

26

თითონ საკუთარის ჩემის მეხსიერებიდამ, და არაფერი არ ურევია აქ, რაც სხვის კალამს ეკუთნოდეს, სხვისი ნაწერებიდამ იყოს ამოდებული.

გარნა არც კი ვიცი საიდან დავიწყო წერა, რა რიგზე ამოვწურო სამახსოვრო წიგნიდამ ნანახი და განაგონი ილიას ცხოვრებიდამ.

მგონია ისევ ისა სჯობია თავიდამ დავიწყო, ათადამ-ბაბადამ, როგორც თითონ ილიას უყვარდა თქმა, ესე იგი შინ მივიდე მასთან და ჯერ შინაური კაცი დანახოთ.

*
* *

ილია ჯერ იდგა ახალ, ბებუთოვის ქუჩაზე, სტაროსელსკის * სახლის პირდაპირ. მერე ოთხმოციან წლების მეორე ნახევარში ის გადავიდა კუკიას, თავის დის ლიზა საგინოვის სახლში, ბოლოს დროს იმან იყიდა საკუთარი სახლი ანდრიას ქუჩაზე.

ილიას არ ჰქონდა ფართოდ გაშლილი სტუმრიანი სახლი. მასთან თქვენ ვერ შეხვდებოდით ქალაქის მაღალ საზოგადოებას, Велико-светская публика-ს. მის სალონში თქვენ შეეყრებოდით მხოლოდ მწერლებს, არტისტებს, საზოგადო მოღვაწეთ, ქალთაგან მარტო ნათესავებს.

თუ რამე სადამო გაკეთდებოდა მასთან ან წვეულება იქნებოდა, მომსვლელები ამათ წრიდან იყო.

ილია იყო თავაზიანი კაცი, პურმარილიანი მომლხენი. მას პირადად და მის სუფრას, რომელსაც ქართუ-

* სტაროსელსკი ილიას ქვისლი იყო და ალბად აქ მოხსენებული სტაროსელსკიც ან თვით ქვისლია ან მისი ახლო ნათესავი ს. ც.

27

ლი კერძი თავის დღეში არ განშორებია, მუდამ ქართველი მოსამსახურენი მსახურობდნენ. საქართველოს საუკეთესო კაცს და მამულის მოყვარეს, მუდამ სწავლული და მამულის მოყვარე მოსამსახურე ებედებოდა.

თითონ ილიამ გვიამბო: ერეკლე ბატონიშვილს ვაჟი რომ დაეხადა დილა ადრიანად ჩემთან შემოიჭრა ბიჭი

და ჩვენ შორის ამ გვარი დიალოგი გაიმართა:

მომილოცავს ბატონო!

– რა, ბიჭო?

– ბატონის რძალს ვაჟი ეყოლა ამ დილას.

*

* *

1884-ს იყო თუ 85-ს, როცა ილია წამოვიდა სა-
მეგრელოს მთავრის ბიბლიოთეკის ჩასაბარებლად, ილია
ისე გამხიარულდა, რომ ბანძას მექი ფაღავასას ** და ჩემ-
თან ცაიში * სულ „ფარინა, ფარინა *** იმღერა და
ფერხულით გული შეიჯერა.

ილია აუჩქარებელი კაცი იყო, დინჯი, მძიმე.

აუჩქარებელი ხშირად ნიშნავს ზარმაცს და ეს თვისება –
ზარმაცობა – ღმერთო შენ შეგცოდე და ილიას ცილისწა-
მებად არ უნდა მიეთვალოს.

დიმიტრი ყიფიანმა მოსწერა იმას ერთხელ ქვიშხე-
თიდამ სამდურავი, რას უგვიანებ წერა-კითხვის საქმე-
ებსო. სხვა რომ ვერა მოახერხა რა თავის გასამართლე-
მელი, ილიამ პასუხად მისწერა მხცოვანს პატრიოტს, არა-
ფერია, ყველაფერს მოვასწრებითო, – რუსთველმა სთქვაო:

* მექი ფაღავა – ვექილი, საზოგადო მოღვაწე, მემამულე სოფ.
ბანძაში. – ს. ც.

** ცაიში, სოფელია, სამეგრელოში, სადაურიც ი. მეუნარგია
იყო. – ს. ც.

*** ეს სიტყვები შეიძლება შეცთომით იყოს დაწერილი ნა-
ცვლად მეგრული „ჰარირა-ჰარირა“-სი, რადგან ცეკვის დროს
ასე მღერიან სამეგრელოში და არა „ფარინა-ფარინას“ – ს. ც.

28

„თქმულა, სიწყნარე გმობილი სჯობს სიჩქარესა ქე-
ბულსა“.

მეორე მაგალითი: 1890 წელს, როცა ქალაქმა ბა-
თუმმა ითხოვა, თბილისის სააზნაურო ბანკს ნება მისცე-
მოდა მიეღო გირაოდ ბათუმის მამულები, ფინანსთა მი-
ნისტრი ქალაქს ჩამოვიდა, მაგრამ ილია არ წარსდგა
მასთან და არ წარუდგინა ამ საგანზე მოხსენება. როცა
ამის გამო საქმის გარდაწყვეტა დაგვიანდა და ილიას უსა-
ყვედურეს რატომ მინისტრი არ ნახეო, პასუხად სთქვა:
„ვერც ჩემი მისვლა დააჩქარებდა საქმეს და ვერც ჩემი
მიუსვლელობა დააბრკოლებდაო“.

*

* *

მაგრამ ილია, როგორც ეს შეეფერება პოეტს ხში-
რად და ადვილად მოდის ალტაცებაში და ეძლევა პათოსს

ხანდახან სულ უბრალო მიზეზების გამო.

– ვაა... ვერ წარმოიდგენთ... მითხრა ერთხელ იმან, რაღაც შემთხვევის გამო, ბრაზილიის იმპერატორმა დონ-პედრომ შეუთვალა ვიქტორ ჰიუგოს (აქ მგოსანი წამოდგა ზეზე და გამოიჭიმა მთელის მისის სიმაღლით): შენი ნახვა და გაცნობა მწადიანო. ამის პასუხად ჰიუგომ შეუთვალა მეფეს: მე სადარბაზოდ არავისთან არ დავდივარო. მაშინ იმპერატორმა და მისმა ტახტის მემკვიდრემ თითონ ინახულეს დიდი მგოსანი. ვიზიტის დროს, როცა მასპინძელმა სიტყვაზე „თქვენო უდიდებულესობაო“ უთხრა მეფეს, მეფემ სიტყვა შეაწყვეტინა მგოსანს და უთხრა თავის მემკვიდრეს: Сын мой, помни, здесь нет другого Величества кроме Виктора Гюго... ეს სიტყვები ილიამ დიდის ამბის-ყოფით წარმოსთქვა, ეტყობოდა სიხარული, რომ ქვეყნის მბრძანებელი ასეთგვარად ემორ-

29

ჩილებოდა სიტყვისა და ლექსთა მეფეს როგორც იყო ვ. ჰიუგო.

*

* *

ლაპარაკში ილია უძლეველი იყო. მის დიალექტიკას, მისს მოსწრებულ სიტყვებს, მის მდიდარს ლექსიკონს ჩვენს ქართველობაში წინ ვერავინ უდგებოდა. ვის არ ახსოვს მისი სიტყვები საადგილმამულო ბანკის წევრთა საზოგადო კრებებზე წინააღმდეგ ძმათა მაჩაბელთა. ბევრნი გრძნობდნენ, რომ სიმართლე ვანო მაჩაბლისაკენ იყო, მაგრამ ილიამ გაჭეჭყა ის თავის დიალექტიკით და მოსწრებული სიტყვებით.

აი ერთი მაგალითი ილიას უძლეველობისა ლაპარაკში. „ვის-რამიანის“ ბეჭდვა რომ იწყებოდა, უნასკნელი რედაქციის დადგენა და ვარიანტების ერთიერთმანეთთან შეთანხმება მიანდვეს ილია ჭავჭავაძეს, პეტრე უმიკაშვილს და ალ. სარაჯიშვილს. ერთს უძველეს ვარიანტში ამათ დაინახეს, რომ უ-ს ბრჯგუ არ აქვს. ილიას მეტი რა უნდოდა, ჩვეულებრივის აღტაცებით იმან დაიჯინა უ უბრჯგუოდ დავბეჭდოთო. უმიკაშვილი თითონ თაყვანისმცემელი იყო ყოველგვარის არქაულის ფორმისა, მაგრამ ასე გასინჯეთ იმასაც კი შეემინდა ამგვარის გადაწყვეტილებისა. რადგანაც კორექტორი ის იყო, ეშინოდა ბრჯგუს განდევნა იმისთვის არ დაეწამებიათ. იმან დასწერა ამ საგანზე დადგენილი გადაწყვეტილება და ხელი მოაწერინა ილიასა და სარაჯიშვილს. მერე წიგნი დაიბეჭდა.

მაგრამ შენი მტერი. ის რომ დაიბეჭდა, თქვენ თითონ გადაშალეთ წიგნი და დაინახეთ შიგ რაები სწერია.

ექნებოდა უ-ნით დაწერილ სიტყვებს: ჩვენ – ჩუენ; მოსვე-
ნება – მოსუენება; გამოკვება – გამო...

– ილია, ეს რა გიქნიათ, როგორ დაგიბეჭდნიათ – ჰკი-
თხეს პოეტს.

– წარმოიდვინეთ: მე რომ რუსეთში ვიყავი პეტ-
რეს გაუკეთებია. პეტრე, ეს რასა ჰგავს, როგორ დაგი-
ბეჭდნია?

– მე ისე დავბეჭდე, როგორც შენ გადასწყვიტე.

– თავის დღეში მე ამგვარი დაბეჭდვა არ მიფი-
ქრია.

გიფიქრია კი არა, გითქვამს კიდეც და ხელიც მო-
გიწერია, უთხრა გაჯავრებით პეტრემ და გაიხსნა
უბის ჯიბე. ამოიღო მანდედამ ხელმოწერილი ბარათი და
თვალწინ დაუდვა.

– თავის დღეში მე ეს არ მითქვამს, მე სხვა რი-
გად დაწერილი მეგონა, უთხრა მაინც ილიამ და იმდენი
ილაპარაკა, სანამ საწყალი პეტრე დამნაშავედ არ გამოი-
ყვანა.

*

* *

ილია ხელმოჭერილი კაცი იყო. სძულ იმას სჩიოდა
მეტი აღარა ვართ ამ საქველმოქმედო საღამოებისაგანო.
საცაა ჩვენდა სასარგებლოდაც უნდა გავმართოთ წარ-
მოდგენაო და სხვა ამგვარები. უცნობი ქალი ან კაცი
რომ მოვიდოდა მასთან, იმას სულ იმის ეშინოდა, ვაი თუ
ფული მთხოვოსო. ერთხელ საადგილ-მამულო ბანკში მას-
თან მოვიდა პლატონ იოსელიანის ცოლისაგან მოგზავ-
ნილი ქალი. ილიას ეგონა მთხოვნელი არისო და მიღების
უარზე დადგა, მაგრამ მოგზავნილმა შემოუთვალა პლა-
ტონ იოსელიანისაგან დარჩენილი ნაწერი მომაქვს თქვენს

ჟურნალში დასაბეჭდათო და პოეტს გადასცა – „მეფე
გიორგის ცხოვრება“, იოსელიანისაგან შედგენილი, შემ-
დეგში „ივერიის“ ნომრებში დაბეჭდილი *.

მაგრამ ამ ხელმოჭერილ კაცს სულ არაფრად მიაჩნდა
ასობით და ათასობით ფულის წაგება ბანქოს თამაშში.

ოთხმოციან წლებს დასდევს ილია თითქმის ყო-
ველ საღამოს თამაშობდა. ჩვეულებრივი მისი პარტნიო-
რები იყვნენ გიორგი შარვაშიძე ** (დიმიტრიჩი), კონ-
სტანტინე რეიტერი, *** კოლა ერისთავი, დავით ავალი-
შვილი. კრუჟოკში ან კლუბში ის ხშირი სტუმარი არ

იყო. იქ თუ წავიდოდა ის მხოლოდ ზაფხულობით. მე ხშირად გამოვსულვარ დილა ადრინად ალექსანდრეს ბაღში და შევყრივარ ილიას კუკიიდან მომავალს შემდეგ ღამის თამაშში გატარებისა.

განსვენებული ილია ხონელისაგან გამიგონია: ილიამ მთელი ღამე თურმე ითამაშა სადღაც კლუბში და ათას-ხუთასი მანეთი წააგო. შინ რომ დაბრუნდა და ეტლის გასასტუმრებლად ქისა ამოიღო, შიგ ნაშალი ვერ იპოვა, ერთი თუმნიანი-ლა შერჩენოდა იმას გაუტეხელი.

– ეჰ, საცა სხვა წავიდა ესეც წავიდესო, გაივლო მგოსანმა გულში და გაუწვდინა ქუჩერს თუმნიანი.

– აჰა წაიღე, უთხრა პოეტმა.

– ბატონო აქ ერთი თუმანია.

– არაფერია, წაიღე, განუმეორა მან.

– გეტყობა კნიაზო. წუხელის მოგიგიათ, ღმერთმა ყოველთვის ასე მოგაგებოსო, დაუმაძლა სულგრძელ მგოსანს თვალგაპრიალებულმა ქუჩერმა.

* ვანო მაჩაბლისაგან განაგონი.

** აფხაზეთის მთავრის მემკვიდრე მწერალი, დრამატურგი ს. ც.

*** რუსი მოხელე – ს. ც.

32

*

* *

ახლა უნდა გადავიდე ილიას რედაქტორობაზე და გაზეთზე, მაგრამ ჯერ მოისმნეთ ეს რამდენიმე ნაწყვეტიც ჩემის დღიურიდან á bâton rompu.

გაზეთის „ივერიის“ გამოცემას რომ მოვიდა ხელი ილიამ, ის დიდს ფაცა-ფუცში იყო. მე იმ დროს პეტერ-ბურგში ვიყავი დროებით და – რადგანაც გაზეთში თანამშრომლობა მქონდა აღთქმული (სხეათაშორის გაზეთში უნდა დაწყებულიყო ჩემგან შეკრებილი ისტორიული და სამწერლო ნაკვეთების ბეჭდვა, რომელზედაც ფსევდონიმად ლელო ეწერათ. თითონ სათაური ნაკვეთი ილიასაგან არის გამოგონილი, მაგრამ ფსევდონიმი არ მოსწონდა).

20 დეკ. 1885-წელს ილია მწერდა თბილისიდან:

„დაგვანებე, ჩემო იონავ თავი და დაგვაობლე ამისთანა გაჭირვების დღეს... მაგრამ რა გაეწყობა? თურმე სოფელი ასეა. თუმცა შენ ბევრს გვაკლიხარ, მაგრამ ჩვენ მაინც ჩვენსას არ ვიშლით და ვჩხირ-კედელაობთ 1-ს იანვრისთვის. ვნახოთ ღერძი ბედისა როგორ დაიწყებს ტრიალსო. გიგზავნი გამოცხადებულს და ყველგან გაგზავნილს უწყებას ჩვენის ახალის გაზეთის გამოცემის თაობაზედ. ზოგიერთმა ჩვენგან ახლად შემოღებულმა სიტყვებმა და ტერმინებმა მოწონების და დაწუნების ღაღადი მოჰ-

ფინეს ჩვენს სალიტერატურო არე-მარეს. ჩვენ ვნუ გეშობთ და ვამბობთ *Значит, свет нас заметил.* უარარაობას კიდევ ესა სჯობია. ახ, ნეტავი ეხლა ჩვენთან იყო. ყინვამ მაგ უმადურ და უსიხარულო ქვეყნისამ გული არ გაგიყინოს და არ დაგვლუპოს შენდამი მსასოებელნი.

33

შენი ფსევდონიმი არც ერთი არ მომეწონა. აქ მოვიგონეთ ორი ფსევდონიმი; 1. „მე ვარ და ჩემი ნაბადი“ თუმცა გრძელია, მაგრამ შენზედ ზედ გამოჭრილია;

2) „აბედი“, ვითომ ნაკვესმა შენ ცეცხლი მოგიკიდა როგორც აბედს და შენ ჩვენ გადმოგვეცი. ეს უკანასკნელი კარგია, მაგრამ აკაკი წერეთელს საბუთს მისცემს ქართული აბედი რუსულ *одед*-ად გადააქციოს; მაინც შენ სხვის სადილების მადებარს გეძახოდა და დაგცინოდა. ორში ერთი ამოირჩიე და ტელეგრამით მაცნობე.

ასოებისათვის ფული საჭირო არ არის, რადგანაც თვითონ ასოები აქ ჩამოვასხმევიწინეთ და ძალიან ცოტა განსხვავება აქვს მანდაურებთან. წიგნები რაც საჭირო იყო, დავიბარეთ, ვიდრე შენი წერილი მომივიდოდა.

ნიკოლაძესა სთხოვე და შეეხვეწე ჩემმაგიერ, ჩვენს გაზეთს თავისი ნაწერებით შეეწიოს. მომიტევოს ამ ჟამად, რომ საკუთარს წერილს არა ვსწერ. ეგ იმისთანა კაცი არ არის, რომ ამის გამო გაგვიწილდეს და გულიდამ ამოიღოს ჩვენი გაზეთი, წვრილმანმა წვრილმანს მოუკიდოს ცეცხლი.

ქალაღდის თაობაზე სერებრიაკოვს * წერილი მივწერე და პასუხს ველი. ჯერ ხანად *Новое издание*-ს ფორმატის ქალაღდს ვიხმარებთ.

კაცო, რატომ არა გვწერ, – ეგ ჩვენი მუხრან-ბატონი რას სჩადის და როგორ მიჰყავს ჩვენი საზოგადო საქმეები. შენგან მიკვირს და მეოცება. ღმერთსა ვთხოვ, რომ სამერმისოდ არც ერთი შემემთხვას შენგან და არც მეორე. ასე, ჩემო იონავ,

* სერებრიაკოვი – ქართველი მრეწველი ოქრომჭედლიშვილი.
ს.

34

იყავ მშვიდობით და დღეგრძელობით და არ დაივიწყო, რომ შენ ერთად ერთი მეგობარი გყავს და ის ერთად ერთი – შენი ილია ჭავჭავაძეა.

20 დეკემბერი.

P. S. მოუთმენლად ველი შენს სტატიას. ილი-

კომ მოგიკითხა. მოიკითხე ყველანი, ჩემი ნაცნობები.

„ივერიის“ პირველი ნომერი გამოვიდა 1 იანვარს 18864 წ.

„ივერიის რედაქცია ამ დროს კუკიის ქუჩაზე იყო მოთავსებული პოეტის დის ლიზა საგინოვის სახლში. დაბლა იყო გამართული გაზეთის სტამბა, მაღლა იყო რედაქცია და იდგა თვით რედაქტორი.

რომ ახვიდოდით მეორე სართულზე, მარცხენა კარებს შეყავდით თქვენ გაზეთის რედაქციაში და მარჯვენას ილიას სადგომში. სადგომის ყურეში, შესვლისთანავე, მარცხნივ იყო რედაქტორის კაბინეტი – პატარა ტანის ოთახი – სწორედ ისე იყო მოწყობილი, როგორც ეს შეფერებოდა მის პატრონს – პოეტს და მამულის მოყვარე რედაქტორს.

შეხვიდოდი თუ არა კაბინეტში, ყველაზე უწინ თქვენს ყურადღებას იქცევდა ფერადის სურათებით აჭრელებული ჭერი ოთახისა. ჭერის ოთხ კუთხეზე იყო დახატული ფართო მედალიონები მეფის ლუარსაბისა, დიმიტრი თავდადებულის, გიორგის თამარის მამისა და დავით აღმაშენებლისა. შუაში იდგა წმინდა ნინოსი.

კედლებზე ეკიდა: მეფე ერეკლე, გორგასლანი.

კედლებზედვე: სოფლის გლეხკაცი და ყასაბი გაბაევისა, მურილლთ-იოს გრავიურა, მითოლოგიური სურათები.

35

კაბინეტი სავსე იყო შკაფებით, სტოლებით, წიგნებით, ქანდაკებებით.

რომ მიიხედ-მოიხედავდით, დაინახავდით ერთგან შექსპირის ბიუსტს, სხვაგან გიოტესას, კიდევ სხვაგან რუსთველისას, გარიბალდისას.

იქა-აქ კვდლებზე: კაკაბს და ხოხობს.

და რადგანაც ნამდვილს ქართველს ძველთაგან ანდერძად უწერია, თქვენ ამ კაბინეტში ნახავდით რვა ყანწს, ერთს მეორეზე უდიდესს.

მთავარი სტოლი კაბინეტში სავსეა რაგინდართი: წიგნებით, გაზეთებით, სამწერლო იარაღებით, სულ ყველაფერი ამ დიდ სტოლზე არეულ დარეულია, რომ აქაც გამართლებულიყო ნათქვამი პოეტურს დაუდევნელობაზე. აი აგერ დიდი ამომშრალი საწერელი, რომელშიაც ვიღაცას მეორე მომცრო ტანის საწერელი ჩაუდგამს. აი შველის ქანდაკება, რომელსაც რქაზე პოეტის ჩაჩი აქვს წამოცმული. აი გადაშლილი წიგნი, პაპიროსის ნამწვრით შუა გულში, აი გლობუსი, საანგარიში, სათვალი, გაზეთის ორიგინალები, ვეებერთელა წითელი კარანდაში...

თუ სადამოა, ამ სტოლთან თითონ რედაქტორი ზის და აქ ამ ვიწრო ქარხანაში მზადდება დღეს ის აზრი,

რომელიც ხვალ შეიძლება სახელმძღვანელოდ გახდეს ყველა ქართველისათვის ბაქოდამ დაწყებული სოხუმამდის და კავკასიის გარეთაც.

როგორც გაზეთის თავი – მესვეური ილია დიდად ნაყოფიერი იყო. ის ბევრსა სწერდა და გრძლად სწერდა. გრძლად წერა სამწუხაროდ, მისი ნაკლულეევანება იყო.

36

გაზეთი წიგნი არ არის, რომ კაცი დაუჯდეს იმას და იკითხოს. გაზეთის სტატია თუ ჟურნალის სტატიად გახადა კაცმა რაც უნდა კარგად იყოს ის დაწერილი, თვისს ღირსებას კარგავს.

გაზეთი თქვენ ბულვარზე სადმე იყიდეთ, გზა-გზა მიმავლად იმას თვალი გადაავლეთ ან ვიჯექით სადმე, ზელტერის წყლით სიცხიდამ სული მოიბრუნეთ და უფრო მეტი ხანი მოანდომეთ იმას, რომ წაიკითხოთ ტელეგრამები, ახალი ამბები, მცირე შენიშვნები და ბოლოს თუნდ მეთაური წერილიც, თუ ის მოკლედ არის დაწერილი. მაგრამ თუ ეს წერილი გრძელია არა ადვილად საკითხი, გაყოლებით დაწერილი, წინასიტყვაობით, სხვადასხვა წინადადებით ერთმანეთში აცმულ გადაბმული, რომელსაც აჭრელებენ: „როგორცა ვთქვი“, „რომელიც რომ“ და სხვა ამგვარები, თქვენ იმას ეერ წაიკითხავთ.

და თუ წაიკითხავთ, ღმერთმა მშვიდობა მოგცეთ, ბევრი დრო გქონიათ.

უმეტესობა კი ათის მკითხველიდამ ცხრა, ამ სტატიას არ წაიკითხავს.

გრძელი სიტყვა მოკლედ ითქმის თუ შაირზე მართო სთქვა რუსთაველმა, ალბათ იმიტომ, რომ მეთორმეტე საუკუნეში არც გაზეთები იყო და არც მოწინავე სტატიები.

მე ხელთ არა მაქვს ილიას გაზეთის „ივერიის“ კოლექცია და მაგალითს აქ ვერ მოვიყვან. მაგრამ ისე მახსოვს, რომ იშვიათია ილიას მოწინავეს არ ეჭიროს გაზეთში ორისამი სვეტი, ხან ოთხი, ხუთი, ექვსი.

გაზეთს ქვეყანა კითხულობს და ქვეყანას ამ გაუთავებელის სტატიებისთვის არა სცალია.

37

ფრანგუზები იტყვიან: quand vous voulez dirce- il pleut, dites il pleut. ეს ქართულად ასე ითარგმნება: თუ გინდათ სთქვათ, რომ წვიმს, სთქვით წვიმს. და ნუ მოყვებით ათადამ-ბაზადამ, ნუ დაიწყებთ ციდამ, ღრუბლიდამ, ჰაერიდამ, სთქვით მოკლედ: წვიმს.

ისევე ითქმის საზოგადოდ იმ გვარ მეთაურ წერი-

ლებზე, რომელსაც ეკუთვნოდა ილიას წერილები. ეს წერილები მოკლედ და პირდაპირ ვერ ეუბნებოდნენ მკითხველს იმას, რისი თქმაც მის დამწერს უნდოდა და რაც, როგორც პოეტს, მას შეეძლო.

მეშინია მეტის თქმა არ გამომივიდეს, მაგრამ არ შემიძლია შემთხვევით არ ვისარგებლო და ამ გრძელ მოწინავეებზე ორი-სამი სიტყვა კიდევ არა ვსთქვა ყოველი გაზეთის ნომერი, რომელშიაც გრძელი მოწინავე წერილია დაბეჭდილი წვალეზა ჩემთვის.

ერთი დიდი, საფრანგეთის ფილოსოფოსია ოგიუსტ კონტი ამბობს: მწერალს არ უნდა ჰქონდეს უფლება ათამაშოს მკითხველი თავის სურვილისამებრ, სწეროს როგორც იმას უნდა. ყველაფერი კანონს და ზომას უნდა ემორჩილებოდეს, უნდა იყოს განსაზღვრული, რომ ყოველს ფრაზაში ქვემდებარე იყოს, შესმენილი, დამატებითი სიტყვა და კიდევ არ მახსოვს რა და შემდეგ ფრაზა თავდებოდეს, მძიმე დაესმოდეს. როცა მე ვხედავ ოთხი-ხუთ სვეტიან მოწინავე წერილებს გაზეთში, მეც ის ცხოვრებაში განუხორციელებელი ფიქრი მომდის, როგორც კონტს, რომ შეიძლებოდეს ამ გრძელი მოწინავეების შემოკლება, თუნდ ისეთ გვარად როგორმე, როგორც მაგალითად სახელმწიფო სათათბიროში ამოკლებენ ორატორის სიტყვებს ხუთი წამის ლაპარაკის შემოღებით.

38

ჩემი იდეალი გაზეთის მოწინავე წერილების მწერლისა არის საფრანგეთის ჟურნალისტი ჟირარდენი. აი როგორ ახასიათებს ჟირარდენის წერას საფრანგეთისავე მწერალი დანკური:

„ის (ჟირარდენი) იწყებს რამე საგანზე ლაპარაკს, წამოაყენებს წინ ერთს აზრს, თეზისს. მოუსვამს კალამს და ორ სტრიქონში – საქმის ექსპოზიციცა მზად არის. ორი-სამი სტრიქონი და ჟირარდენი შუაგულ კითხვამდის არის მიწევნილი. ამის შემდეგ ის გადადის დასკვნაზე, ის წინდაწინ ხედავს თუ თქვენ მასთან არა ხართ თანახმა და თქვენსკენ მოიწევა. თქვენ შეიძლება ამაზე ესა და ეს მითხრა; ახ, რა გვარად მებრალებით და ის მტვრად აქცევს თქვენს ნათქვამს ან დაანახებებს სხვებს რომ თქვენი ნათქვამი მტვრად აქცია და გასწევს და გასწევს. კიდევ ორი სტრიქონი. გათავდა? არა იმას კიდევ აქვს სათქმელი უკანასკნელი სიტყვა, კიდევ უნდა გაისროლოს უკანასკნელი ისარი. ახლა მაინც გათავდა? არა. ერთი სტრიქონი კიდევ და ამ სტრიქონში სულ ბევრი-ბევრი სამი სიტყვა, ხანდახან ორი და ხშირად ერთი. ჰა, და გათავებულ მოწინავეს ხელი მოაწერა“.

ამგვარად ილიას არ უწერია.

ილია რედაქტორი თავის ნაწერს სანამ დასაბეჭდად გაგზავნიდეს, უკითხავს თავის თანამშრომლებს და ყო-

ველგვარ რჩევას სიამოვნებით ითვისებს.

ნინო მუხრან-ბატონის * დასაფლავების გამო მოწინავე წერილი რომ დაბეჭდა ილიამ „ივერიაში“ მეორე დღეს მკითხა:

– წაიკითხე ჩემი წერილი..

* დავ. დადიანის და, ივანე მუხრან-ბატონის მეუღლე.
ს. ც.

39

– წავიკითხე გუმინდამვე სტამბაში და ძალიან მომეწონა. მხოლოდ რომ გინებებიათ და სამღვთო წერილის სიტყვაც ჩაგეტანებიათ – შიგ შრომის მოყვარე ქალის თობაზე დაწერილი. წერილი ბევრს მოიგებდა.

– რა სიტყვები?

– ოფლითა შენითა სჭამდე პურსა შენსა.

– ოხ, მართლა რომ კარგი იქნებოდა და რატომ ეს სიტყვები არ მიაწერე რაკი სტამბაში მოხვედრიხარ, მითხრა ნაღვლით რედაქტორმა, საზოგადოდ დეკლამაციის მოყვარემ.

სხვის ნაწერებს ის თავაზიანად ეპყრობა, მხოლოდ ენის მხრით კი რედაქტორი ულმობელია, მეტადრე იმერეთიდან გამოგზავნილი კორესპონდენციების და წერილების კითხვის დროს.

ენის მხრით ილია მართლა რომ კანონმდებელია ქართულის ენისა.

ვიდაცამ უსაყვედურა ვიქტორ ჰიუგოს: ეს სიტყვა ფრანგული არ არისო.

– არ არის, მაგრამ იქნებაო, თავმოწონებით უპასუხა საფრანგეთის დიდმა მგოსანმა.

იგივე ითქმის ილიაზე და ქართულ ენაზე.

სანამ ილიამ არ დაუშალა ჩვენებს, ჩვენში ამბობდნენ: უფალი კერესელიძე, უფალი მესხი. ეს უფალი ან იყო ამოღებული სამღვთო წერილიდან, ან იყო ნათარგმნი რუსული სიტყვიდან „Господин“. ილიამ სთქვა: „უფალი მესხი“-ს თქმას „ბატონი მესხი“-ს თქმა არა სჯობიაო? და ეს სიტყვა მას აქეთ დაკანონდა ჩვენში და ამ სიტყვას ისე მაგრად აქვს მოკიდებული ფესვი ჩვენს ენაში, რომ მას ვერ განდევნის ეხლა ჩვენის ენიდან ვერც „ამხანაგი“ და ვერც „მეგო-

40

ბარი" ისე, როგორც ვერ განდევნეს ფრანგულის ენიდან „monsieur“ ვერც დიდი რევოლუციის citoyen-მა და ვერც კომმუნის Compagnon“-მა *.

მისგან მოგონილი სიტყვებთაგან მახსოვს: სულთა-სწრაფვა, თვალთა ხედვის ისარი.

იმას არ მოსწონს იმერულ წერილებში სიტყვები – „ვღებულობ“, „ამნაირად“. საცა ეს სიტყვები მოხვდება ილიას, მაშინვე შლის და სამაგიეროდ ზემოდამ აწერს, სიტყვებს: „ვიღებ“, ამ გვარად“...

საცა ჩვენ ჩვეულებრივად ვწერთ „მაგრამ“-ს ილია ხშირად – „გარნა“-ს სწერს.

იმასვე ეკუთვნის, მგონია, ეს „ჰსჩადის“, რომელსაც ეხლამდის ვერ შევთვისებთ, რომელიც არც ერთს ძველს წიგნში სადმე არ წამიკითხავს, არც ხალხში გამიგონია სურამის აქეთ მაინც. გადაღმაც არ ვარ დარწმუნებული, რომ ხალხში „ჰსჩადის“ ითქმოდეს, შეიძლება თქვან ჩადის, სიტყვიდამ ჩასვლა, მაგრამ „ჰსჩადის“ ქალაქში უნდა იყოს გაზვიადებული.

როგორც რედაქტორს, ილიას მუდმივ ერთი აზრი აქვს, გაზეთი არავის პირადობას უმართებულოდ არ შეეხოს. ამ მხრით ის დაშინებულია გაზეთის „დროების“ განურჩევლობით.

სხვისი პირადობის დამცველს თავის გაზეთში, ილიას არ უნდოდა რომ თითონ უმართებულოდ ეხსენებია ვინმე სხვის გაზეთში. როდესაც ნიკო ნიკოლაძემ „Новое издание“-ში ერთი წერილი დასწერა მისი პიროვნების შესახებ, ილიამ თავი შეურაცყოფილად მიიჩნია და ორი თვისი ამხანაგი მიუგზავნა სეკუნდანტებად ნიკოლაძეს – კოლა

41

ერისთავი და სოსიკო შალიკოვი *. ამან პასუხად ჭავჭავაძეს გაუგზავნა ორი თვისი ამხანაგი, დათიკო გურამიშვილი და ნიკოლოზ სიმბორსკი ** და მათ შორის გაიმართა დუელი. მოწინააღმდეგენი დადგნენ ბარიერზე გატენილის ფიშტოებით და ყველაფერი იმ წერტილამდის იყო მოყვანილი, საცა ტყვია უნდა გავარდნილიყო, მაგრამ ამ დროს სიმბორსკიმ უკანასკნელის შერიგების სიტყვით მიმართა დუელიანტებს და დუელი მორიგებით დამთავრდა.

არ ვიცი ამ ორში ვინ ვის მოსთხოვა ბოდიში, რადგანაც მათი შერიგების პროტოკოლი არ გამოქვეყნებულა. როგორც გამიგონია, ჭავჭავაძეს უნდა ეთქვას: მე შეურაცყოფილად მივიჩნიე ჩემი თავი მარტო იმისათვის რომ ნიკოლაძეს თუნდ ერთი წამით შეეძლო ეფიქრა, რომ რაც „ივერიაში“ დაიბეჭდა ის ჩემის თანხმობით იყო. ნიკოლაძეს ამაზე უნდა ეთქვას: თუ ეს ასეა, მაშ, რაც მე ჩემს გაზეთში ვთქვი ჭავჭავაძის შესახებ უკან მიმაქვსო.

რედაქციაზე და გაზეთზე ლაპარაკს აქ ჩვენ უნდა დაურთოთ აკაკის სიტყვებიც.

აკაკი თამარაშენში იყო ვანო მაჩაბლისას და დაძინების დროს „ივერიას“ კითხულობდა. კითხვის დროს აკაკის მიეძინა და გაზეთს სამთლილად ცეცხლი მოედო.

– ფუ, ფუ, ფუო და ერთის ყოფით გააქრო ალი პოეტმა.

– მაღლობა ღმერთს, წყალნარევი გაზეთია, თორემ ვერ დავაქრობდიო, აამა მგოსანმა ილას მოწინააღმდეგე ბანკის დირექტორს.

* სამხედრო პირი. ს. ც.

** რუსი პოეტი. ს. ც.

42

*

* *

ილიას, როგორც ბანკირს, ქართულ მწერლობასთან და ხელოვნებასთან კავშირი არა აქვს და ამიტომ მის მოღვაწეობაზე თბილისის საადგილმამულო ბანკში, მე აქ დიდს არას ვიტყვი. პოეზია და ანგარიში, ქნარი და ჩოთქი, როგორღაც ერთმანეთთან ვერ მიდიან, გარნა არ უნდა დავივიწყოთ, რომ ილია საზოგადო მოღვაწეა და რომ მისმა გონებაზე და შრომამ მისგან დაწყებული და წარმართულა ბანკი იმ ზომამდის მიიყვანა, რომ დღეს ბანკის დამფუძნებელი უკვე დაუბრუნდა უკანვე ძირის თანხა და როგორც ახლა, ამ წასვლაზე თბილისში შევიტყვე, შარშან ბანკს ქონდა იმდენი შემოსავალი, რომ ოთხასი-ათასი მანეთის ზარალი დაუფარავთ და კიდევ დარჩენილა წმინდა შემოსავალი ორასი ათასი მანეთი. ილიას ბანკის მოგებით უდგია დღეს სული ყველა, თბილისის თავადაზნაურთა საზოგადო დაწესებულებათ.

დრო და ადგილი ნებას არ მაძლევს აქ ილიას ნაწერებზე ვილაპარაკო და ამით ვათავებ ამ ჩემს მოგონებას პოეტის ცხოვრებიდამ, თუმცა სამახსოვრო წიგნში ჯერ კიდევ არ გამომლეგია მასალა ილიას შესახებ.

*

* *

დასასრულ ორი-სამი სიტყვა ილიას საგურამოში ცხოვრებიდამ.

ილია ყოველ ზაფხულს ამოდიოდა საგურამოს, დასასვენებლად. აქ ქონდა იმას ერთი, პატარა, ქვის სახლი, რომელიც გადაყურებდა არაგვის ხეობას. სახლის წინა ბალკონიდან მგოსანს თვალწინ ედგა მშვენიერი – პანორამა კავკასიის მთებისა და ქვემოთ არაგვის ხეობისა.

43

ილია აქ ისვენებდა ქალაქის საქმეთაგან დამაშვრალი. ყოველ 20 ივლისს, მის დღეობაზე აქ მოდიოდა მას-

თან მოსალოცავად დიდძალი ხალხი ქალაქიდან და ხან-დახან იმერეთიდანაც.

აქ, საგურამოში უახლოვდებოდა ილია ხალხის ცხოვრებას და ენას.

ყოველს შეყრაზე და გამოლაპარაკებაზე სოფლის ხალხთან ილიას, როგორც ფუტკარს, საზრდო გამოქონ-და ხალხიდან თავის სიტყვიერებისათვის.

დღეს ამა და ამ გლეხმა ლაპარაკში ესა და ეს ჩემ-თვის უცნობი სიტყვა სთქვაო, იტყოდა მგოსანი. ერთ ამ-გვარ სიტყვად მახსოვს იყო სიტყვა პეიტარი. ჰაზრით გამოდიოდა, რომ პეიტარი კაცის წოდება უნდა ყოფი-ლიყო და რომ ჩავიხედეთ ლექსიკონში, აღმოჩნდა რომ პეიტარი საქონლის ექიმს რქმევია.

ხალხი იყო ილიასთვის წყარო მოკამკამე ენისა და გამოთქმის.

დამატებანი

სამახსოვრო წიგნიდან.

როგორც ამ წიგნაკში ვნახეთ, ი. მეუნარგია თავისთავს „ქართუ-ლის მწერლობის მეწვრილმანეს“ უწოდებს და „სამახსოვრო უბის წიგნაკებს“ დაატარებს, რომ მის ფურცლებზე ამათუიმ მწერლის ცხოვრებიდან, შეხვედრებიდან ან საუბრებიდან მნიშვნელოვანი მომენტები მოხაზოს.

მისი აზრით ასეთი მნიშვნელოვანი მომენტებია მწერლის ცხოვრებაში მისი მოსწრებული სიტყვები, ან, როგორც თვითონ მეუ-ნარგია უწოდებს, „ნაკვესები“.

სიტყვა „ნაკვესი“, როგორც თვითონ მეუნარგია გვაცნობს (ამავე შრომაში), ილიას მიერ არის გამოგონილი. როდესაც ილია გაზეთ „ივერიის“ გამოცემას შესდგომია, ერთერთ თანამშრომლად ი. მეუნარგიაც მიუწვევია, რომელიც, სხვათა შორის, თავისი შეკრე-ბილი ისტორიულ და სამწერლო ნაკვესებს „ლ ე ლ ს“ ფსევდონი-მით ბეჭდავდა.

თუ როგორ აფასებდა ამ „ნაკვესებს“ ილია, ამის შესახებ თვით ილიას პირადი ბარათი (მეუნარგიასადმი მიწერილი 1885 წ.) მოგვითხრობს, რომელიც ამ წიგნშივეა მოყვანილი.

ჩვენ კი ვცდილობთ დავუმატოთ აქვე ზოგიერთი რამ, ნაკვესები იქნება ის თუ სხვა სახის ცნობა იმავე სამახსოვრო წიგნაკიდან.

ილიას შესახებ ჯერ გამოუქვეყნებელი და უცნობი.

აი ესენი:

*
* *
*

1884 წ.

გუშინ საადგილმამულო ბანკში კრება იყო ქართული თეა-ტრის შესახებ. ბევრი გრძლად ცხარედ ლაპარაკობდა რა ვიცი რას, უმეტესობა კი სდუმდა.

ილიამ გადახედა ჩაფიქრებულად და მდუმარედ მსხდომარეთ და უთხრა თავის მეზობელს:

Господа, вот где сила!..

*

* *

1887 წელს თელავში გარდაიცვალა მოლექსე იოსებ დავითა-შვილი, რომლის პანაშვიდზე თბილისში, აკაკიმ სიტყვა წარმოსთქვა.

– აკაძის სიტყვა დავითაშვილის დასაფლავებაზე ისეთი ხამუტია, რომელიც ვისაც გინდა იქ მყოფს დაედგმოდაო სთქვა ილიამ, რომელსაც აკაკის სიტყვა არ მოსწონებოდა თურმე.

*

* *

1891 წ.

ვანო მაჩაბელმა მიაშხო:

ამას წინათ ილია დაბრუნდა რუსეთიდან. ბანკში რომ შემოვიდა, შემოვეხვიეთ და ველაპარაკეთ. საქმის გარემოება რომ გვიამბო, ანტონ ფურცელაძემ ჰკითხა ილიას:

– სხვა, რა ამბავია რუსეთში?

– რა უნდა იყოს, უპასუხა ილიამ, რუსეთში აწმყო არ არსებობს, რუსეთი მომავლით ცხოვრობს.

– არა – თუ?

– ჰო, დედა არ წამიწყდეს, დაასაბუთა ილიამ, რომელიც მუდამ დედის სულს ფიცავდა.

*

* *

30 აპრილი 1901 წ.

დღეს სადილად ვიყავი მიწვეული იაკობ გოგებაშვილთან.

სადილსზე იყვნენ: ილია ჭავჭავაძე, ანტ. ფურცელაძე, ვახტანგ თულაევი, ნიკო ცხვედაძე, პეტრე უმიკაშვილი და მე (მეუნარგია, ს. ც.).

46

სადილის წინ, სანამ მასპინძელი სადილის თადარიგისათვის სხვა ოთახებში დადიოდა, ილიამ ზალაში თვალი მოჰკურა ერთს წიგნს «Ревматизм и подагра» Паленштехера.

– ვაი ჩვენი ბრალი, ახლა ამას წაიკითხავს იაკობი და ამ ავადმყოფობას გაიჩენსო, სთქვა ილიამ.

*

* *

ერთსა და ერთს საადგილმამულო ბანკის საზოგადო კრებაზე არტილერიის გენერალმა თავ. ხიმშიევმა ილაპარაკა ილიას წინააღმდეგ. სხვათა შორის იმან სთქვა:

– Со стороны кн. Чавчавадзе это является давлением

На общее собрание...

ილიამ უპასუხა:

– Я бы желал знать, о каком это давлении изволит говорить кн. Химшиев. Если он говорит о давлении логики, это да будет мое, позвольте мне сказать ему, что против такого давления никакая тяжелая артиллерия не могла-бы ничего сделать.

*

* *

ზალიკი ჭავჭავაძემ დეპუტა მოსწერა ილიას, – სად არის ჩემი ძმა იასე, შემატყობინეო.

ილიამ პასუხად მისწერა:

– Сначала уплатите за ответ.

*

* *

ე ქ ვ თ ი მ ე ხ ე ლ ა ძ ე : ბატონო ილია, შეარიგეთ ანტონ ფურცელაძე და ნიკო დიასამიძე.

ი ლ ი ა : მე რა ვარ?...

ხ ე ლ ა ძ ე : საქართველოს მამა ხარ...

ილია: მე საკუთარი შვილი ვერ გამიკეთების და საქართველოს მამობა როგორ უნდა გავუწიო?

*

* *

24 აგვისტო 1883 წ.

საგურამოში ვიყავი ილიასთან. ჩემს ოთახში სტოლქვეშ ჰამაკი ვიპოვე, გავიტანე გარეთ, კაკლის ტოტებში გავაბი და გავწექი.

47

ილია კაკლის ქვეშ იყო წამოწოლილი და „ილიადას“ კითხულობდა.

მ ე : ვიშ, სწრედ ინგლისელის მოგონილია ეს ჰამაკი.

ი ლ ი ა : არა. ამერიკელის.

მ ე : ამერიკა და ანგლია ვის გაუყვია?

ი ლ ი ა : ოკეანეს.

*

* *

ერთხელ ილიასა ჰკითხეს: რატომ არის, რომ აკაკი სულ შენზე ძვირს ლაპარაკობს და შენ კი მას მუდამ აქებო!

– ორივე ვცდებითო – ჩაილაპარაკა დინჯად მგოსანმა.

*

* *

ილიამ თქვა:

„ვეფხის-ტყაოსანი“ ზღვა არის, ყველას ეყოფა მისი სიმდიდრე, რომ ისწავლიდნენ.

დიდი ფსიხოლოგიური მომენტია – პირველად რომ დაიბარა

ნესტან-დარეჯანმა ტარიელი, მარტო შეხვდა და დაითხოვა, ვერ ელაპარაკა...

ავთანდილს თავისი სიყვარული დათრგუნვილი აქვს, расчитано, მაგრამ ძილში მაინც წამოაძახებს...

*
* *

ბარემ ესეც დავუმატოთ, უფრო მეუნარგიაა მაგრამ მაინც ილიაზეა ლაპარაკი და იმავე ბოხჩიდანა ამოღებული, საიდანაც ზემომოყვანილი სტრიქონები:

22 ივლისი. 1883 წ.

გუშინ საგურამოდან დავბრუნდი. იმერელი კაცისათვის ქართლის ცხოვრებაში სუყველაფერი საინტერესოა. მე პირველად გუშინ გავიგონე ქრთლელი კაცის დამახების კილო. თითონ ილიამ დაუძახა ბალკონიდან ბიჭს:

– თეედოო, აააა თედო!

ლექსუმელი რომ ყოფილიყო, ასე დაუძახებდა:

48

– თეეეედოოოო-თედო!

მეგრული:

– ვოო თედო უუი.

გურული:

– თედო უი!

*
* *

რვეულის ერთ კიდეზე ი. მეუნარგიას ასე მიუწერია:

„აკაკის ილია არ მოსწონდა ისე, როგორც მიქელანჯელოს რაფაელი არ მოსწონდა, კორნელის – რასინი, ვიქტორ ჰიუგოს – ლამარტინი, ლამარტინს – ალფრედ მიუსე, ბეტჰოვენს – რასინი...“

*
* *

ილია ჭავჭავაძე ულმობელი გუშაგია თავისი ენისა. იგი ტრფიალია ქართულის ენისა. იმას უნდა ქართულმა ენამ სამარადისოდ შეინახოს თვისი ქართული პირისსახე, თავის არსებაშივე იპოვოს სურათი განძლიერებისა და განვითარებისა.

*
* *

აკაკი სულ მედამ თავისუფალი კაცი იყო, იშთა-იშთა მღერალი, მწერალი, მოლაპარაკე, მოსიარულე; ერთად-ერთი თანამდებობა, რომელიც იმას ქონია მის სიცოცხლეში, ქართული ტრუპის რეჟისორობა იყო, მაგდამ გამბეტას იმდენ ხანს არ შერჩენია მინისტრობა, რამდენადაც იმას რეჟისორობა. ამასთან... „იტყოდეს ენა ჩემი კადნიერად ანუ მივსცნე მე იმას ქებანი სიცრუისანი“... აკაკის

სულ მუდამ ჩანგი არ უჭირავს ხელში და სამშობლოსა და ერს არ უმდერის, ხანდახან და ხანდახანზე უფრო ხშირად იმას, როგორც ილიას (ხაზი ჩვენია – ს. ც.) – რამეთუ კაცნი ვართ, სათამაშო ქაღალდიც უჭირავს ხელში“... *

* ამოღებულია ი. მეუნარგიას მოგონებდან აკაკის შესახებ. მოგვყავს როგორც ილიას პირადი ცხოვრებიდან ერთი მომენტის აღმნიშვნელი მასალა.

ილიას წერილი ი. მეუნარგიასადმი

საყვარელო მძაო იონავ, შენი წერილი მივიღე და ვწუხვარ რომ ვერაფერს სანუგემოს ვერ მოგწერ. აი საქმე რაშია: ჩვენ ყოველს გასასესხს ვგზავნით დასამტკიცებლად სამინისტროში, რომელსაც უნდა ვაჩვენოთ რამოდენა შემოსავალი აქვს მამულს; ეს შემოსავალი ერთი 12^{1/2}-დ უნდა აიღო და ის იქნება ფასი მამულისა. ამ ფასისა 60%-მდე შეგვიძლიან სესხად მივცეთ. რუსულად მოგწერ, რომ უფრო კარგად გაგაგებინო: Чистый годовой доход помно-Жается на 12^{1/2} и произведение определяет стоимость имущества. С этой стоимости выдается 60%.

პრინცესას მამულს შემოსავალი აქვს, შენ იწერები, 4000 მანეთი, აქედამ კანონით უნდა გამოვიდეთ 20% სხვადასხვა ხარჯისათვის, დარჩება 3200 მანეთი. ეს 3200 მანეთი უნდა ავიღოთ 12^{1/2}-ჯერ და გამოვა 40.000 მანეთი მთელი ფასი მამულისა. აქედამ 60% შეიქმს 24.000 მანეთსა. ჩვენ ზოგიერთის მოსაზრებით ამაზე მეტი დაუნაშნეთ, სახელდობრ, 28.500 მანეთი და ამასაც ვშიშობთ, – ვაი თუ სამინისტრომ არ დაამტკიცოს. ბევრიც რომ მოვიზნდომოთ, ზემოხსენებულ ანგარიშს ვერ წაუვალთ და ვერც ვერაფერი გავხდებით რაკი შემოსავალი 4000 მანეთზე მეტი არარის, სამწუხაროდ ჩემდა, შენს წერილზე ამაზე უკეთესს და მეტს პასუხს ვერ მოგახსენებ. რაც არ შეიძლება, იმას ჩვენი გამგეობა ვერ იქმს. **

შენი ერთგული ილია ქ ა ვ კ ა ვ ა ძ ე .

ი. მეუნარგიას სიტყვა – ილიას დასაფლავებაზე

დაუვიწყარო მამულისშვილო ილიავ! შენი ჭირისუფალი განა მარტო ეს, აქ მოზღვავებული საზოგადოებაა, რომელიც სამი დღეა შენს ცხედარს გარს ახვევია?

არა, შენი ჭირისუფალი მთელი შენი სატრფო ქვეყანაა, სამშობლო – კახეთიდან დაწყებული შავ-ზღვამდის. ამ ქვეყანაში ყველას უგემნია შენი ნაწერების სიტკბოება და ყველა სასოებით და სიამაყით იხსენიებს შენს სახელს; ოჯახი სად დარჩა ამ ქვეყანაში, საცა ბავშვს შენი „აყვავებულა მდელო“ არ ეკითხოს და მოზრდილს „მკრთალი ნათელი“ და „ჩემო კარგო ქვეყანავ“ არ ემღეროს?

* ლაპარაკია სალომე დავ. დადიანის ასულ მიურატზე – ს. ც.

** წერილი უთარიღია.

შენის ქმნილებით დამტკბარმა, შენის მოკვლით გულჩამწარებულიმა, საქართველოს შორეულმა ქალაქმა ფოთმა დაფნითა და ყვავილით შეამკო ცხედარი შენი და უკანასკნლი სალაში გიდღვნა შენ, დაუვიწყარო ილიავ. შენ, რომლის მარჯვენისა ქმნილებამ აღზარდა

რაამი საქართველოს მოზარდთა თაობათა და მწერალთა, შენ, რომელმაც „კაცია-ადამიანი“ სთქვი, „გლხის ნაამბობი“ გვიამბე, თავდადებული შეგვაყვარე და „ნაოჭის მსგავსად შეკრული“ შუბლი განდეგლისა დაგვიხატე ხელოვნურად.

შენ რომ ფეხი შემოდგი მწერლობაში, სთქვი, „მამული საყვარელო, შენ როსლა აყვავდებიო“ და მთელი შენი სიცოცხლე ამ მამულის აყვავებას ამსახურე და მამულის შვილების გულში ადაგზნე ყოველგვარი კეთილი აზრი და გრძნობა.

დღეს ყოველი ქართველი, თვით შენი მტერიც, შენი შეგირდია. ნეტავ გაგაგონა ის ძლიერი ღაღადი ჩვენის მწერლობისა, რომელიც შენმა მკვლელობამ ასტეხა, რომ დამტკვარიყავ იმ აზრით, რომ სამწერლო მემკვიდრეობა შენგან დატოვებული არც ისე მჩატეა, როგორც მტერსა ჰგონია.

შენ არ გვასწავლე ქართული ენა? შენ არ შეჰქმენ უკანასკნელად „სულთა სწრაფვა“, „თვალთახედვის ისარი“? შენ შეგვაყვარე მამული და გვაჩვენე, როგორ უნდა სამშობლოს მტერთან ბრძოლა. „დიდ მუხასთან პატარა ია რომ ყვაოდეს, ვის რა უნდაო“, გააგონე შენს მამულის მტრებს; სამეგრელოს ჩამოშორება რომ მოინდომეს საქართველოდამ, შენ სამეგრელოში მოდი, იქაურობა ნახე და სთქვი: „სამეგრელოში მოვედი და საქართველო ვნახეო“ და მედგრად გამოესარჩლე დაჩაგრულ სამეგრელოს.

და აწ შენ დაგვმორდი, დაგვტოვე იმ დროს, როცა თვით მამულის წმიდათა-წმიდას შეეხო განუსჯელი თაობა და როცა შენს წინასწარმეტყველურ სიტყვას შეეძლო ეს თაობა გონს მოეყვანა.

ვინ იცის ეგებ შეიძლებოდეს კაცს კაცობრიობა უყვარდეს მამულზე უფრო, მაგრამ მამული რომ არ უყვარდეს კაცს, სამშობლოს ენა არა სწამდეს, ამის სმენაც კი ეზოთირება ჩვენს ყურს, რომელშიაც შენ 40 წელიწადი სულ ჩაგვძახოდი: ჩიტს თავისი ბუდე უყვარს, ნადირს თავისი კლდე და სორო, მთელ განათლებულ ქვეყანას თავისი მხარე და ენა და მხოლოდ ჩვენში გამოჰტყვრა პირველად ეს დაუჯერებელი: „ენა რა არის, მამული რას მიქვიანო“.

51

ვიმედოვნებ, მოძღვარო, რომ ეს შეცდომა წარმავალია, რომ ჩვენნი მძანნი და შვილნი, ვითარცა უძღებნი შვილნი, დაუბრუნდებიან სამშობლოს და მამული კვალად დარჩება ყველათათვის საუკუნოდ თავყვანსაცემად ისე, როგორც საუკუნო არის იდეალები სიმართლისა, სიკეთისა და მშვენიერებისა, რომელთაც შენ მსახურებდი.

მშვიდობით ჩვენო ენის კანონმდებელო, დიდო მამულის-შვილო!

(1907 წ. 9 სექტ. ილიას დასაფლავებაზე წარმოთქმუ-

ლი სიტყვა. იხ. კრებული – „ილიას სიკვდილი და დასაფლავება“ გვერდი 194 – 195).

ქუთაისი ილიას საღამო.

27 ოქტომბერს ჩვენი ქალაქის თეატრში გაიმართა სალიტერატურო და სამუსიკო ილიას საღამო. საღამო შესდგებოდა სამი განყოფილებისაგან: პირველ განყოფილებაში გვირგვინებით და ყვავილებით შემკულ ილიას სურათს გარშემო იდგენ ილიას თხზულებების გმირები და მათ შორის ბ. ბ. ს. თ. ხუნდაძე, ი. მეუნარგია, კოლა ერისთავი და ნ. დავითაშვილისა.

ფარდის ახდისთანავე ს. ხუნდაძემ მიმართა დიდებული პოეტის სურათს თავის საკუთარი ლექსით, რომელშიაც გატარებული იყო აზრი ილიას სიდიადის და უკვდავების შესახებ. თითქმის აშნა-

ირივე ლექსით მიესალმა კ. ერისთავი. შემდეგ სურათის წინ და-
აწყვეს გვირგვინები და ფარდაც ჩამოეშვა. ამავე განყოფილებაში,
ფარდის მეორედ ახდის შემდეგ, მშვენიერად წაკითხა ილიას „ნანა“
ქ. ნ. დავითაშვილისამ. მაგრამ ყველაზე უფრო საყურადღებო ამ
განყოფილებაში იყო მეუნარგას „ნანახი და გაგონილის“ წაკითხვა
ილიას შესახებ.

თვის „ნანახში და გაგონილში“ იონა მეუნარგამ გააცნო
დამსწრე საზოგადოებას ილიას ცხოვრებიდან სხვადასხვა ეპიზოდები,
რომლებშიაც ილია იხატებოდა როგორც ადამიანი და როგორც
მოქალაქე.

ბ. იონა შეეხო ილიას ახალგაზრდობას და დამსწრეთა გასა-
ოცებლად თავის სტყვა მან ასე დაამთავრა: „მან ლიბერალობა
ოქროს ჯაჭვზე გაცვალაო“, ე. ი. მწერლობას თავი დაანება და სა-

52

ხელმწიფო სამსახურს მიაშურაო. ეს თუმცა ყველამ კარგად იცოდა,
მაგრამ ილიას პატივსაცემლად გამართულ საღამოზე ბევრს უადგი-
ლოდ ეჩვენა ასეთი აზრის გამოთქმა და საზოგადოებაში ალაგ-ალაგ
უკმაყოფილება გაისმა.

კიდევ კარგი, ამით რომ დაკმაყოფილებულიყო ბ. იონა. მაგ-
რამ ეს ასე არ მოხდა. მან ბატონმა იონამ თავიდან დაწყებული ბოლო-
მდე მოსდგა ილიას და სულ მიწასთან გაასწორა. მოიყვანა რამდენიმე
მაგალითი მისი ჯიუტობის დასამტკიცებლად, მოიგონა მისი ხელ-
მოჭერილობა საქველმოქმედო საქმიანობისათვის, მაშინ როდესაც ის
თითო ლამეში ხშირად ათას-ხუთას მანეთობით აგებდა ბანქოს თა-
მაშეო. იონას უნდოდა საზოგადოებისათვის დაემტკიცებინა, რომ
ილია შესანიშნავი დიალექტიკი იყო და ამის დასასაბუთებლად მო-
აგონა დამსწრეთა ილიასა და ძმათა მაჩაბელთა შორის ამტყადარი
უთანხმოებანი თბილისის სათავად-აზნაურო ბანკის საქმეებში. აქ
მან პირდაპირ განაცხადა, რომ თუმცა ხშირად სიმართლე ივ. მაჩა-
ბლის მხარეზე იყო, მაგრამ ილიამ თავის შეუბრალებელი დიალექ-
ტიკის შემწეობით მაჩაბელი გასჭყლიტაო. გვიკვირს რად დასჭირ-
და მეუნარგას ასეთი მოგონებების წაკითხვა ილიას პატივსაცემ-
ლად გამართულ საღამოზე? როგორც ბ. იონას მოგონებებიდან სჩანს,
ილიას პირველ ხანაში ლიბერალობა ოქროს ჯაჭვში გაუცვლია,
შემდეგ კი 1875 წლიდან პოეტს ბანკირობა დაუწყია. ბ. იონამ ესეც
უსაყვედურა დიდებულ პოეტს და სთქვა: „პოეტი და საანგარიშო
ჩოთქი როგორ უნდა მოთავსებულ იყვნენ ერთათო“!

ბ. იონას აზრით ილია არც პუბლიცისტი ყოფილა მაინც და
მაინც დიდებული. ამის დასამტკიცებლად ბ. იონამ დიდხანს ილა-
პარაკა ილიას მეთაურების შესახებ გაზეთებში და ის აზრი გამო-
თქვა, რომ ილია მეტად გაჭიანურებულ მეთაურებს სტამბავდა გა-
ზეთში და ეს კი მოსაწონი არ არისო. თავის აზრი რომ უფრო და-
ემტკიცებია მას, საფრანგეთის პუბლიცისტ ჟორარდენსაც კი შე-
ადარა ილია და დაასკვნა, რომ აი როგორი უნდა იყოს პუბლიცის-
ტიო. ერთი სიტყვით, ბ. მეუნარგამ თავის „ნახულში და გაგო-
ნილში“ ილიას თითქმის მარტო უარყოფითი მხარეებს მიაქცია ყუ-
რადღება და ამ გარემოებამ დიდი უკმაყოფილება გამოიწვია დამს-
წრე საზოგადოებაში. რაც ბ. იონამ თქვა. სხვა ვინმეს

53

რომ ეთქვა, მგონია საქართველოში აღარ დააყე-
ნებდნენ. (ზახი ჩვენია – ს. ც.) ბ. იონას კი – არაფერი. ამითი
დასრულდა პირველი განყოფილება.

მეორე განყოფილებაში ცოცხლად ჩაატარეს ბ. შალიკაშვილ-
მა, ქ. ქ. ჯავახიშვილისამ და ქავთარაძისამ სცენა „კაცია ადამია-
ნიდან“ – ლუარსაბსა და დარეჯანს შორის.

მესამე განყოფილებაში მშვენიერი სანახავი იყო აპოთეოზი. ილიას სურათის გარშემო ჩვენ ვხედავდით მისი თხზულებების უკვდავ ტიპებს. შუაში, სურათის ქვეშ თეთრად ჩაცმული მუზას ხელში ლირა ეჭირა. ეს სურათი დასაწყისში კარგ შთაბეჭდილებას ახდენდა, მაგრამ როდესაც ქანდაკებასავით გაქვევებულმა პირებმა დაიწყეს ილიას ლექსების დეკლამაცია, ეს კი რაღაც უხერხულად ეჩვენა საზოგადოებას. მართლაც და რა შთაბეჭდილება უნდა მოეხდინა სურათს. როდესაც გაქვევებული ადამიანები თვალების დაუხამხამებლად კითხულობდნენ გრძნობებით სავსე ლექსებს? მხოლოდ კოლა ერისთავმა დაარღვია სურათის უმოძრაობა და თავისებურად, მღელვარებით და ალტაცებით წაიკითხა ლექსი. რაც შეეხება ბ. შალიკაშვილს, რომელიც აჩრდილის სახით უნდა გამოცხადებოდა სცენაზე მყოფთ და „აჩრდილიდან“ უნდა წაეკითხა რამდენიმე ადგილი, მან გადააჭარბა და აჩრდილი კი არა, უფრო გაბედული მეომარი გვეგონებოდათ.

სადამოს საზოგადოება კარგა ბლომად დაეცა, თუმცა იმდენი არა, რამდენსაც მოველოდით (ხაზი ჩვენია – ს. ც.). აღსანიშნავია ის გარემოებაც, რომ აქაური სასწავლებლების უფროსებმა ნება არ დართეს უფროს მოსწავლეებს სადამოზე დასწრებოდნენ. მგონი ეს ისე ძნელი არ იქნებოდა, რომ მოენდომებიათ სასწავლებლების უფროსებს, რომელთა შორისაც უმეტესობა ქართველები არიან.

შემთხვევით დამსწრე.

გაზ. „ალი“ № 3. 5 ნოემბერი, 1908 წ.

54

ილიას მეორედ მოკვლის განზრახვა.

ილიას მეორედ მოკვლა მოიწადინეს. მოკვლა არა ფიზიკური, რომლის გამეორება შეუძლებლად გახადეს უსუსულგულო ნამირალემა, არამედ მოკვლა სულიერი. ეს უკანასკნელი მკვლელობა, რასაკვირველია, უფრო მძიმეა, ვიდრე პირველი. ფიზიკურმა მკვლელობამ შეიძლება ხელი შეუწყოს სულიერს უკედავებას, სულიერი მკვლელობა კი მეტ ნაკლებობით ამართლებს ფიზიკურ მკვლელობასა. ფიზიკურმა მკვლელობამ პოეტისამ შეიძლება მისი ქმნილებანი და მათი სარგებლობა უფრო კარგად შეაგნებინოს საზოგადოებას, ამ ქმნილებათა შეგინება კი გულს უცრუებს მათზე საზოგადოებას და დიდს ვნებას აყენებს მას.

ვინ მოიწადინა ეს მეორე მკვლელობა ილიასი? ბატონმა იონა მეუნარგიამ. სად მოიწადინა, სალიტერატურო სადამოზე, რომელიც გამართული იყო ილიას დაბადების დღეს ქუთაისში მის სახსოვრად, სადიდებლად. რა სთქვა? თქვენ ადიდებთ და აღმერთებთ ილიას; მაგრამ მე, რომელიც ახლო ვიდექი განსვენებულთან, სხვა აზრისა ვარო და მოგონების სახით მან თურმე დაუგროვა დამსწრე საზოგადოებას ვეებერთელა ზვინი ჭორებისა, საიდანაც გამოდიოდა, რომ ილია ყოფილა: ძუნწი, გულქვავი, ზარმაცი, ბანქოში მფლანგავი თავისი ქონებისა, სოფისტი, ეგოისტი გამჭყლეტელი მართალი ადამიანისა და თითქმის უნიჭო პუბლიცისტი. „ილია მიწასთან გაასწორაო“, გულისწყრომით სწერს კორესპონდენტი თვით გაზეთი „ალისა“ (ხაზი ჩვენია – ს. ც.)

დავკითხოთ გარემოებათა, ამსუბუქებენ მეუნარგიას „სულმალლობას“, თუ უფრო ამძიმებენ?

ჯერ მას არ გაუცვეთნია ის წაღები, რომლითაც იგი ილიას დასაფლავებას დაესწრო, როდესაც იგი თავის სიტყვაში წყევლა-

კრულვას უგზავნიდა ჩვენი დიდების მხეც მკვლელებს, და დღეს კი
მას თითქმის ტალახში სვრის.